

LATDING THAN TUANG KALUMMEI

J.C. Choate

Published by:
World Literature Publications
Winona, Mississippi

© 2001, copyright, World Evangelism Publications

This printing - 5,000 copies - 2025 – **Rongmei**

InDesign Layout: Shane Fisher

Translated by: Samuel Pamei

Email: pameisamuel07@gmail.com

WhatsApp number: (+91) 7627951777

Phone number: (+91) 6009241881

Websites:

www.worldevangelismlibrary.org

www.gospelgazette.com

www.worldevangelism.org

www.worldevangelismmedia.com

Printed by:

World Evangelism Publications

Winona, MS 38967

Kalam Dinmei

Khristianmei rui Raguang ta kalum khang nge. Suaimak nga meiguaina rui mi hei nu pung de. Latthan daai mi khou hei kiu: Kumma kalum khang? Mi latthan hei mundao khang Kathanmei Latding hei jao khang kage nai the. Mitei the aniu rui su bammei kiu ntao pat punimei para nun khou hei. Nang ruina aniu le na kathaimei khou hei kajao e thei, sunimei thou Raguang rui kage naimei phu pat ngam puni.

Raguang ruina Kalat tipat lou the khatni hi lat tei ruina Kachun/Kangui tei ndao lou the. Kamei rui ringbam lam khou buni, phuamling lam khou buni, khristian panti lam khou buni, rammithei kalummei lam khou buni , salou the. Kamei rui lat kachaeng akhatna tilou e mei guaina khang khatni, hilat tei ruina Kachun tei meiguaina khou ndao lou the, khatni Poubaomei ruina laina akhatna (paep tuang laina) mei khou taan sulou muai the, khatni

mi laina ta tei tigai khang pu/ kachaeng akhat (Khrista tuang gaicham), khatni mi gaicham lat piumei paan rui guloumei latou mei jaeng rui, latpiumei guai ta tei Katuang phuamling khou lou kaduai lou na, khatni khristianmei guai Kata kalum khang sa pui jaeng rui, meiguai ruina kathiak akhatna khou kalum khang lani e, akhatni kachang-chang nga Kamei rui lani e.

Mi kandi khou hei kachang kalingnga kalummei hei akhatna suni tuang nge, khatni mi Poubaomei rui Kalat khou ndao loumei khou suni tuang nge. Kalummei bam hei bai-bai bam nu de, ki, mi guai tei kachaeng akhatna ni tuang nge, kabam tei tabui tabui tun bam kan khuan sinni na. Lat thiak baime khou sapu e thei, gan khat rui kalum khang tat re thei, kamei rui kalummei bammei thiak akhat thu ariu puni di the. Kabam baithang tat pat dat pui gan khou ni nchamma kalum bammei ariu dat muai ni tuang nge, kumma kandi kapum khou tat lik pui gan khou. Kumme ki, aniu tuang gan khou thu kum mak khuan the. Kalang akhat rui kathiak akhat khou kalum, khat dat ruina ni kathiak baime khou kalum bam dat. Mi khou hei thou tei rui chummei khatni thou tei rui nkhuamei? Mi bam khou hei the Raguang latkaeng gutni-me kiu. Raguang rui kahaomei kiu tabui tei cho tumei Kalat tei pa pukhou rui thai khang di the. Aniu rui Kamei ruina kage naime/ kahaomei tei ariu rap tu bu khou , mi khou tei bam khang the. Nbuna, aniu ruina Raguang rui ningmei rammakmei thiak khou kalum bammei ta ariu pu khou mi thiak tei nkhuaina kalum mei the tuna sa khang the. Latbam khang kiu, aniu rui Acts 17 pa pui gan khou hou e Athens mei guai tei thai makmei ram kalum kalum bammei tei. Kumdatlana, Poubaomei rui sa e, mansei tuang riakdin khou kalummei rui gaeng makmei ram kalum khou keilou nu e tuna. Mi hei chum the, kumma aniu rui sadat re kiu tho- nchummei ram kalum le nkhuamei ram kalum hei nai e tumei. Aniu duan kiu thu nchumma kalummei lam tei tithai lou khang tumei tuang nge kaduan suna para nun guai hei kathai kei punimei hei, nchumma kalummei thiak khou. Kum pu khou ruina aniu rui Raguangta bumaeng khatni nchummei khou kalum bam the na diugai bam khang the.

J.C.Choate
Church of Christ
Winona, Mississippi
January 23, 1982.

KAJAOMEI

1. Kalummei Tuang Kabaa.....	5
2. Kalummei Pou/Pei.....	9
3. Kalummei Puat.....	13
4. Kalummei Jaat/Kathiak.....	17
5. Thaoreimei Khristian Nun Ram Kalum.....	21
6. Kalummei Tingmik.....	25
7. Kalummei Thiak.....	29
8. Baibal Kathaimei	33
9. Kalummei/Huaineimei.....	37
10. Lu Suanmei.....	42
11. Poubaomei Taektu.....	46
12. Tipatmei.....	50
13. Katinmei Bam Khou Kajaomei/Rakai kuhmei.....	54

PARA 1

KALUMMEI TUANG KABAA

Baibal khou kalummei tumei latkaeng kabaa thu siamruai sumei, thuanmei, champoumei, him tidaime, khatni chakhuang champou sumei tu tuang nge. Mi hei kabaa tinai kho tu e thei, kalummeipu tei ram sigai thaina ram-khatta kalum pui ta e. Tiki, aniu guai rui guang diang maina jao kho:

1. Aniu rui siamruai suna kalumme.

Mi luan khou hei aniu rui kalummei tumei hei- taansumei, piumei, taan taanhmei, kalummei khatni baime. Baibal ruina Raguangna nun guai ti hei bang khang kumma la e Poubaomei rui kaipou su lana. Paul ruina kamei hei kaluai-kaluaina bang nge na sa lou e. Kamei rui sa e, “Latdiutatmei akhat khang Raguang rui kaolouna, Katuang Gaicham din ndao khang Laengpatloumei, Khrista Jisu bang, Paul khou rui” (Romans 1:1). Peter khatni James ruini kummuaina 2 Peter 1:1 khatni James 1:1 khou salou kخانه. Kaniu rui sabammei hei kumme na? Kaniu rui samei thu kaniu rui Poubaomei ta siamruai su e khatni kaniu tuang ram guaina tigut louna tupui tuang nge. Aniu ni kum muai khang the. Paul rui katiu lou e “Tiki ntao thu nangniu ta paep khou rui laduaklou the, kumma nangniu Raguang bang nun di the. Mi tuang thai kiu thu nangniu ta thanmei khou jailoumei, kumma ringsuangmei laamei hei the.” (Romans 6:22).

Tabui kummei taan tei Poubaomei rui chun/kahao cho tumei thai khang kabang khou mei verse nun hei jao kho:

“Tumei thu, Jihudihmei nun rui ata su kasi khang nrikpui chamraeng mpeina ndaengnga rianra pui gan mpeina akhou guang khuan sini, mpeina lung niammei khatni mikdui keimei kajaona ai Poubaomei siamruai taan taanc kan e.” (Acts 20:19). “Nangniu rui gaime de tumei puat ta tei mei nunc rui sina sa mak khang su o. Kalam thu Raguang Guangdih hei thu tujangmei tuang latbam ram e; tiki Buameng Nthanmei rui tihmei rachaptatmei, chu-jaengmei, khatni neilamei latbam de. Mi hei kumma, Khrista siamruai supui mei ta tei Raguang rui pianlou e khatni maansei rui luanlou e. Mi kuma, chu-jaengmei phung guang nimei tuang khatni khat khat ta kasiam thao nimei tuang tei su khang aniu karam nina e.” (Romans 14:16-19). “Aliau maknga taanno; lung gutna Poubaomei siamruai su o.” (Romans 12:11).

Aniu taan lam khou Paul rui kumma hi e, “Heijaeng rui, chanathiu, Raguang rui aniu ta heiju njianloumei tei jaona, ai rui nangniu khou ranna jaenghuai e: nangniu pum hei Raguang khang reipatloumei khatni Kata tipi-anloumei nring racha suna khaenglou o. Mi hei kumma nangniu Raguang ta kalum nipui thou e.” (Romans 12:1). “Maansei siamruai na su tuang e tuna

ning mak nga, Raguang siamruai su tuang e tuna ningnga lung gutna taan o.” (Ephesians 6:7). Poubaomei rui Thyatira khou mei phuamling khou kumma sa lou e, “Nangtaan guai tei Ai thai e. Nang ramjian, nang ramlum, nang taan, khatni nang ramkhaengthai tei Ai thai e. Thaorei khou khang tei suang ntao thu nang taan mbu the tumei Ai thai e.” (Revelation 2:19).

Aniu rui kalummei/rakai kuhmei tuna sa gei si e. Mi hei chumme aniu rui mihei Poubaomei khang siamruai su bam tu e tumei. Kabiak khat khou sapu e thei aniu rui aniu panti hei Raguang khang rui tipatlou bam tu e tumei, kumma aniu ruina kata thuanna kalumma aniu panti hei Kakhang rui tipatloumei tuang nge. Aniu ruina Kalat piu maknga Kata Sunday/ neidak tuang reimei tingmik nung rammethi aniu panti dak khou hei kalum bamme tuna sanu puni na cho?

2. Aniu ruina thuanmei rui Poubaomei ta kalum me.

Paul kanei Silas ruina kangkai khou bammei gan khou tei, “Jipchungjaeng khou Paul le Silas tei Raguang khou huaineina lu suan bam khouanne, kumma baihmei kaengmei guai tei kanei lu tei nking bam khouanne.” (Acts 16:25). Aniu khou Poubaomei rui kumma suaihiamlou cho tumei, akhatni aniu thou Kakhou taanlou nimeis khou Paul rui kumma hi e, “Heijaeng rui Khrista khou rigunmei nai reimei aniu Raguang him thuan kho.” (Ephesians 1:12). Aniu rui patou dat di he, “Kum thena, aniu Jisu paan rui Raguang ta thuanmei hei aniu ram khaeng suna kat taan taan bam di kho-aniu muang rui kajan sa ndaona thuan bam di kho.” (Hebrews 13:15). Peter rui sa e, “Mi nchanmei hei thu nangiu ramlum tei kaling bammei tuang e. Maan kan nimeis kachaek ta sini kalingmei pat khang mai ntei e. Hei tei kumma kachaek khang suang kungmei nangniu ramlum tei kalingmei su khang kaling ni tina di the. Mihei Jisu Khrista ta ndao patpui nung kiu thuankuloumei, himdaimeis khatni champoumeis nangniu latou khang nge.” (1 Peter 1:7). “Chamdinmeis nun rui Raguang lat tei din o; siamruai sumeis nun rui kakhou Raguang rui tiloumeis pumtan tei sinsuna taan o. Kumma ram lam guaina khou Khrista paan rui Raguang him tidai khang taan o, Himdaimeis khatni ngammeis hei tiangsaeng Jisu Kharista khang e.” (1 Peter 4:11).

Aniu rui aniu taan bam kathuina khou Poubaomei ta thuan khang nge, taan bam puni, latsa khou puni, kadai suna Poubaomei tingmik khou aniu rui kalum khang guang kaduai pui gan khou, aniu rui kum taan bammei tei Kata thuanmei tuang nge. Aniu rui kata thuanmei hei guang kariumeis khou rui kahouna, kalam tei nchumma guangloumeis, khatni khou tei aniu rui taan patmeis kaguai tei rui. Aniu lungning hei niamkeis khang nge, khatni aniu rui kathai bammeis lung khou, kalum bam khou, lu suan bam khou, tipat bam

khou, khatni Poubaomei tuang taektu tu bampui gan khou, aniu rui Kata thuan bam khang nge. Kumma aniu rui Kata thuan ngam ni cho aniu rui Kata nu mak pu khou ?

3. Kata champoumei rui Kata aniu rui kalumme.

Khrista rui sa e, “Mihei Pu ta chakhuang sumei kumma, mei guaina rui Kana Mpou ta chakhuang su khang nge. Kana Mpou ta chakhuang su mak-pui mei tei Kata ndiu guangmei kaPu ta chakhuang su mak tuang nge.” (John 5:23). Paul rui kumma hi e, “Nganmei naidat makmei Guang, thei makmei, akhat namei Raguang khang tingsaengjaeng chakhuang champoumei khatni tikgundaimeis su diu. Amen.” (1 Timothy 1:17). Aniu ta Poubaomei rui gulou, suaiahiam lou, aniu khang gairanmei panti rigunmei tilou, khatni Poubao-meis pan rui aniu ni champoumei latou tuang nge.

4. Kahim tidaimeis rui Kata kalum tuang e.

Kahim tidaimeis tumeis thu Kata tikao lou khang, champou khang, thuan khang tupui tuang nge. Mihei ruina aniu tuang latbam khou kalummeis tuang kaba khou tei le ncham tuang nge. Tiki, baibal bam asaek jao dat kho milam khou hei: “Kumma nangniu mei guaina kariuna khuan khat na suna aniu kaipou Jisu Khrista Pu Raguang him thuan bam khang e.” (Romans 15:6). “Kameis rui kaman tina liulou tuang e. Hijaeng rui nangniu pum tei Raguang him tidai khang sinsu o” (1 Corinthians 6:20). “Tiki nangniu Khristameis supui jaeng rui rianrameis ariu e thei, mi khang tei jak rio; tiki nang ta Khristameis tumeis jan hei kaolou the tuna Raguang ta thuanku o.” (1 Peter 4:16). Aniu panti khou machunmeis tumeis kiu Raguang ta jaomeis, Kata tidaimeis, kata jaikaoloumeis, Kahim tidailoumeis, aniu khang gaengmeis lameis phaan. Kakhou kida khang ramkhat sin maekge. Aniu Poubaomeis tingmik khou kat-inmeis thu Kakhou lungning guai tigutlouna kalummeis hei e.

5. Chakhuang champouna Kata kalummeis.

Raguang hei aniu tuang dampou e khatni Khrista rui guloumeipu e. Kata aniu rui champou khang nge. Aniu rui kalat chu khang e. Kalat aniu rui piu khang e. Kahu khou aniu rui niamkeis khang e. Kata aniu rui chakhuang champou khang e. Kalumlu himeis pu rui sa e, “Kameis rui kameis nunta ri patlouna kaniu khang tingsaeng latding dinglou the, Kameis hei nthanmeis khatni tan baomeipu e.” (Psalm 111:9). Kum dat lana Hebrews himeipu rui kumma sa e, “Hijaeng rui kalung dat lakmeis guangdi aniu laatoumeis khang hei rui thuanku bam kho, khatni ping kadanna kameis rui laalou numeis ram kalum Raguang ta thuankuna kalum bam kho” (Hebrews 12:28).

Aniu rui Poubaomeita njian pu khou rui, latpiuna Kahu khou niamkeis khatni thuankumeis lungning kakhang naimeis rui Kahu khou aniu lungning

hei bakpat lana Poubaomeita thuanna kalum ngam tuang de. Kum pu khou na ruina Paul rui samei lat ta tei lalounimei tuang e, “Taan khou puni, lat-sa kho puni, nangniu samei, taanmei guai tei Poubaomei Jisu jan khou sa o khatni taan o. Kapaan rui Pu Raguang ta thaunku o.” (Colossians 3:17).

Meigei thang kalum khang tat bammei tei kathiak nga khou, rammethi gaankhat rui katiulou khou na rui kalum tat bam tuang nge. Meigei si ruina kalummei luan the ki na kalum bam tiki, kalum kachang simei ram kalum thu kalum mak. Kummei nun hei rui kalummei kaba ni thaimak khatni kalum khou rui ramkhatna sinni gaengmei ni latou mak khe.

Guangdatmei gan khou tho, aniu rui kalummei gan khou lung gutna, lungning nthanna, kachang kalingmei khou, thuankulouna, Poubaomei mah khou Kata champouna khatni Kahim tidaina ntao khang khatni tingsaeng jaeng khang kalum kho. Aniu rui kaba naina kalum thai pukhou, aniu rui Kata kalum nipuni, khatni mitei rui aniu ta ram akhat tisu puni khatni Kata ram akhat tisulou puni.

LATTHAN

1. Aniu tuang para lam hei tabuicho ti o.
2. Kalummei tumei hei tabui cho sa o.
3. Mitei kaba tinai khang mitei kumma su khang tha?
4. Siamruai sumei tumei lat kaba hei tabui cho?
5. Kumma Raguang na rui siamruaimei cho?
6. Paul, Peter khatni James kaniu hei siamruaimei dai?
7. Kummei taan Poubaomei rui kahao bo?
8. Hiluan khou hei Baibal bam asaek tio.
9. Tabui jaeng khou rui aniu ruina kalummei ta kalummei duan tuna kaluan luan sa tucho?
10. Latpiu maknga Poubaomeita lalounimei ram kalum, kalum nu dai?
11. Aniu rui Poubaomei ta thuanni tuang nge tumei lam khou baibal bam asaek tei kathai chammo.
12. Kumma aniu rui Kata thuan ngam ni cho?
13. Kana ta champou maknga Puta champouna thuan ngam dai?
14. Kumpui jaeng rui Poubaomei ta champou khang?
15. Kahim tidaimei tumei latkaeng kaba sa o.
16. Aniu panti khou machun nimei hei tabui ta cho?
17. Poubaomei tuang tingmik khou kalum khang katin bammei lam sa o.
18. Aniu dampou thou cho? Aniuta guloumeipu thou cho?
19. Aniu rui kaniu ta kumma dao khang cho?
20. Thou janta aniu rui chakhuang champou khang cho?

21. Colossians 3:17 hei hi o.
22. Meigei thang rui kumma kalum bo?
23. Tabui thiak khou aniu rui kalum khang guang ni cho?

PARA 2

KALUMMEI POU/PUI

Raguang baansiam pang khou Kata kalummei akhatna de, mikiu thu maansei hei the. Raguang rui maansei damloumei hei pumhma ram makge ki du le ningting kajaona damlou e. Ningting paan rui maansei rui lungding la ngam me. Kum puijaeng rui kamei rui kata damloumei puta kalum khang ni ngam, kalum maknga ni ngam tu e. Maansei ruina Raguangta kalum khang lungding lalou khuanne thei, kamei tei kachang nga thuanne khatni champou e.

Maansei hei kalumma ringnihmei jat akhat re. Kamei ruina ram akhatta thu kalum rap kanni de puat akhatta bam puni, maansei akhatta bam puni. Kamei rui kum su rap tuang de khatni kagan nai bam saan kum bam kani de. Tatkanmei gan khou ni ntao gan khou ni maansei rui ram khatta kalum rap de. Kamei rui kalummei puat pang kiu- bu, gaanchuanga, thingtao, duithuak, khatni kandi khou naime puat aju ta. Maansei rui maansei rui kasiamloumei puat-thingtao khou rui, khatni kachaek dandi, kummei guaita ni kalumma lung guang khuanne. Tiki tho, maansei rui kalummei thei Raguang ta jaona kalum khang nge, khatni kata kalum chuina kalum kan khang tei katiu lou khang nge. Kalingsi tho kumma kalum puimei ta tei Raguang rui phu e.

Jisu rui dinlou e, “Tiki kalum changmei guai rui Pu ta bumaeng khou khatni nchummei khou kalum nipui gan guang the, ntao hei the, kalam thu mi kumma kalumpuimei ta tei kata kalum khang Pu rui phu e.

Raguang hei bumaeng e, kumma Kata kalummei guai rui bumaeng khou khatni nchummei khou kalum nina e” (John 4:23,24). Kumpuijaeng rui gaankhat rui chummana kalum rap nu mak ge, karam kalum tei lalounumei suni e thei, kalummei tei chummeiputa khatni mi tei bumaeng le nchummei khou rui kalum ni na de. Aniu rui kum khang hei tabui tuang kage nai cho khatni kummi nacho tumei kakhan cham jao kho:

1. Kalingmei khatni ringmei Raguang ta meiguaina rui thai nu e- Damloumei puat guai rui damloumeipu ta dinlou e. Mihei duak dat lak mei tuang di the, sigai thai kanmei maansei guai ruina hi tuang kachang kalingmei hei nulou kanne thei, kamei tei mi luan khou hei kumma guang rap kanni de. Aniu rui thai e kalingmei khatni ringmei Raguang rui hi guai hei dammeipu e tumei. (Genesis 1:1).

2. Raguang hei ramguaina ta dammeipu khuan e thei, khatni maansei

rui kalat piu ni tuang khuan e thei, Kamei rui kahaomei tei ndao lou kanne. Kumma Kamei rui ndao lou the. Kamei rui hihei Baibal khou rui dinlou the. Aniuta kumma salou e kiu tho Khrista lam khou hilou bammei guai tei aniu rui lum diu khang rui e (John 20:30,31). Nbuna, Nthanmei Latrik guai hei Raguang thiula khou rui guang pui tuang nge (2 Timothy 3:16,17).

3. Raguang rui salou kanmei guai tei Baibal khou hikei lou the, kumma, maansei ruina hilat guai tei ariu tou nu the, thai nu the, khatni piu nu the. Khrista rui kajiab nunta kandi kapum khou tatna gaicham tei khouring kathuina khou din tat khang latdan tilou kan the (Mark 16:15,16). Hitei na rammaknga, tiki, thou thou puni rachaptatmei khang tari mei guai tei ngu puni (Matthew 5:6). Kumdatlana, aniu khou dinlou dat he, thou kummei rui Poubaomei ta lalou nimei ta tei Raguangna su khang nulou puni (John 1:12).

4. Gaankhat ruina Raguang lat palou pukhou, lummei tei khou guang puni.(Romans 10:17). Thaimai le lummei khou ruina kata Poubaomei tuang latdan tei piu khang jailou the mi tei rui ringbam tilou the (Acts 2:38; Acts 17:30; Hebrews 11:6).

5. Latpiumei paan rui kata tei gulouna Poubaomei tuang phuamling khou lou kariu lou the kumma ntao thu kamei tei khristian di the (Acts 2:47; Acts 11:26).

6. Phuamling mei akhat suna khatni khristian akhat suna, Poubao-me rui dinloumei khou tei kalum khang the. Hi kum makmei hu khou tho gaankhat rui baibal lat theilaina kalum ngam mak ge. Aniu rui pa e, “Raguang thu paepmei nun lat chulou mak ge tumei aniu thai e. Kata chakuang sumei khatni Kamei rui ningmei taanmei nun lat rui chulou tuang de” (John 9:31). Thailou kho Raguang rui chulou khang hei kalam kanei kage nai e tumei.

Reimei khou- kamei tei Raguangta kalummei su khang nge. Kaneime rui khou- kamei tei Poubaomei rui samei tei taanpuime rui su ni na e. Mi ruina Raguang le tuna riangruai sumei tuang nge, rammethi Pu le Nah tuang riangruai, rammethi, khristian akhat sulana Poubaomei tuang phuamlingmei su tuang nge.

7. Khristian akhat suna khatni Poubaomei tuang phuamlingmei sula-na, Raguangta kalummei tei bumaeng khou akhatni nchummei khou kalum khang kage nai di he, aniu ram kalum tei lalou nuhmei thiak ram kalum su khang. Hi kaba kiu thu, kalummei hei aniu lungning nchum pui ta e. Hi kiu tho, lungning nthanna, niamma khatni champouna lungningsing khou rui suni ni tuang e. Kummei khou tei lungning nthanmei kage nai the khatni kamei rui subammei khou tei lung gutna taan khang kage nai the. Kalummei pu

tei rui lungning gut lou mak nga kamei rui kalum bammei khou tei maji na khang su e thei mitei sinuime i thiak taa e. Kumlana, kalummei hei nchummei khou su khang nge. Hi kaba thu Raguang lat le na nchamma kalum khang e. Kumma ntao latthan kiu tho Poubaomei rui tabui dinlou bo? Aniu rui kathai bammei hei kumma kaduan suna tat kei pukhou aniu rui phang puni kalummei khou hei Baibal kathaime i, Ra kalummei, Lu suanmei, Poubaomei taektu. Khatni tipatmei higuai hei kajao e tumei. Nbuna, tingmik tei Poubao-me i rui tiloumei tingmik khou supuita e. Nchummei khou kalum makge thei tabui-tabui su bam khuan sinni gaeng makmei ram kalum khou kei lou kanne de. Kumdat lana khat rui gianta maknga kalum bam khuanne thei karam kalum tei gaeng mak muai de. Raguang rui Kata kalumnime i thiak din nthan thiaklou e meitei piuna taan khang suaime i tuang maknga.

8. Kalummeipu tei kabam nchummei khou bam pui ta e (Poubaomei tuang phuamling), Poubaomei rui saloumei thiak khou, khatni nchummei maanse i pang le tuna, Kamei rui lalou nume i ram kalum tei sukho tue thei.

Khouhei katinmei hei peina nthukmei akhat re. Chumma kalummei rui kalang-kalang pat bammei phuam nun, ramme thei pang-pang nga phuam nai the ke na kalum katin nu mak ge kalam tho kaniu rui kalummei thiak tei dinloumei le bai pui jaeng rui e. Kalingmei khristian khatni Poubaomei tuang phuamlingmei ruina Thaengja nung kalum nu mak ge. Kamei rui maanse i riakdin thei tatmei nun le na kalum katin nu mak ge, baansiam rui kasiammei khuan khou kalummei nun thei ni kalum nu makge, phuamling guai khang kalum me i nun le tuna ni katin nu makge, Sunday/neidak tuang reime i ting-mik nung Poubaomei taektu tu makmei nun lena ni katin nu makge, khatni kaniu tuang ru-dam khatni puatkat guai tei nkhuaimeta tidailoumei khou tei katin nu makge. Paul rui sa e, “Jingmei tuang gaeng makmei taan guai tei lai taan riu. Mi pha an tei, sime i tuang sime i taan guai tei ndao pat ro.” (Ephesians 5:11). John rui kumma hilou e, nkhuaimeta dinpou nun lam khou, “Kalam thu mi kumpui me i khang tei duan gai kadipui me i tei mi pu tuang sime i taan khou tei kadam ni kajao the” (2 John 11).

9. Kalummeipu kahak- kalummeipu tei nthui makmei su bam khuan sinni na mi tei rui kamei rui kahaomei khou bam khang ramme. Kamei rui Poubaomeita kalum ni e tu e thei kumma sime i kheiliak guai tei gan pat khang e. (James 5:17), khatni kalungning tei nthanthiak thiak lana, kapum ni su than khatni lungning ni niamke i lana Poubaomeita kalum khang nge.

Nang tho tabui kummei kalummeipu tei tha? Tabui nung nang kalum to? Adi katupma kalum to? Tabui kum khang kalum bam tuang? Thouta kalum bam tuang? Kalummei thu geisi e, tiki, nchumma kalummei thu rao e.

Meigei thang laanmeipu ta kalum bam gei the, khatni khuamei ram kalum khou kalum bam gei the. Baek-baek nga thailou kho nang rui kalum bammei pu tei chum mei e thei khatni chummei thiak khou kalum e thei, kummei nun ta tei the Poubaomei rui Kata kalum khang chunmei nun kiu.

LATTHAN

1. Raguang tuang baansiam pang khou kummei baansiam rui kata dampou ta kalum ngam bo?
2. Kumma Raguang rui maansei ta dam kan to?
3. Maansei rui tabui su khang lungding laa ngam bo?
4. Raguang ta kummei gan khou kachang nga champou lou to?
5. Maansei hei kadaisumei tho tabui dai?
6. Tat kanmei gan khou maansei rui kalum kanmei thiak asaek tei lou o.
7. Thou ta Raguang rui kalum khang phu bo?
8. John 4:23,24 hei pana hila hei dinno.
9. Thou rui Raguang ta sou bo?
10. Genesis 1:1 hei hi o.
11. Raguang rui kachun tei ndao lou dai?
12. Kumma Kamei rui hi taan kan to?
13. John 20:30,31 khatni 2 Timothy 3:16,17 hei pa o.
14. Tabui jaeng khou rui Raguang ruina maanseina ta Katuang kachun thailou khang lani tuang cho?
15. Maansei rui Kachun thai ngam dai cho?
16. Thou rui Raguangna nun su ngammei pumtan ti tu cho?
17. Kumma lummei hei lung khou pat kan tucho?
18. Kummei pan rui gaan khat ta gulou khang cho?
19. Thou rui Poubaomeita kalum khang chamdan bam tucho?
20. Raguang rui paepmei ta chulou dai? Kumma chulou mak tuang?
21. Gaankhat rui Raguang le nthuime riang kumma su khang cho?
22. Bumaeng khatni nchummei khou kalummei tumei kaba hei tabui cho?
23. Gaankhat rui Poubaomeita kalum khang kummei tun bam khang tha?
24. Kumpuijaeng rui katinmei hei heidi kamma kha kage nai tuang cho?
25. Kalingmei khristian rui taan nime asaek tei lapat ro.
26. Kumma kalummeipu rui Poubaomei daeng guang khang cho?
27. Kalingmei kalummei pang geisi nai dai?

PARA 3

KALUMMEI PUAT

Damlou rap khou ruina maansei rui ram kathuina ta kalum khuanne, nei-mik kahak ta sinni. Kandi khou hei ra tumei hei ching-ching nai bamme. Gaisih-sime i rakai aju maansei rui kasiam thaolou bamme tiki, meigei mei rui khou tei pian mak bam khuanne. Kum puijaeng ruai? Tabui tuang nkhu-aime i nai tina?

Maanse i nun pang khou khuaim ei naime i kiu thu ringme i kalingme i Raguang khou lum mak pui jaeng rui the. Khrista rui kakhou shouna salou e, “Raguang hei bumaeng e, kumma Kata kalumme i guai rui bumaeng khou khatni nchumme i khou kalum nina e” (John 4:24). Kumme the i tho kalumni-me i puat tume i hei Raguang ta ni tuang the. Kame i rui hihei thailouna khatni kame i rui kalumme i te i Kata khuanne the i kame i rui machunna phu bamme i bumaeng tuang chujaengme i khatni lungshumloume i te i latou puni.

Duikanme i mi para khou hei aniu ruina thou te i Raguang cho khatni kum puijaeng rui aniu rui kata kalum nicho tume i nphang puni.

1. Raguang hei ramguaina tuang dampou e.

“Thaore i khou, Raguang rui tingpuk le kandih damlou khuanne.” (Genesis 1:1). Mi lam khou hei agi bam nu e, tiki, kum makge na kum sa dat nume i tuang nai na? Jao nkuai na jao o Raguang rui damloume i bansiam guai ta. Kandi khatni hikhui naime i puat guai rui Raguang nai e tume i lian ne. Puat khat hei maekme i khou rui pat numak ge, kumpuijaeng rui gaankhat rui kasiam/damlou pui ta e. David rui sa e, “Tingpuk rui Raguang him nthanna ndao e! Mikhou hei kabaansiam nthanna lianlou e!” (Psalm 19:1). Thou rui hite i agi ngamma? Thou rui agi na?

Raguang rui ngaanme i le ntume i kamaeng khou damlou khuanne. “Khou te i Raguang rui sa the, Aniu maeng khou, aniu ta luhme i maanse i kasiam di kho, kaniu rui kha, nruai, khouring kaguaina, khatni kai khouring numbang khouring, daime i nthiamme i kapumma ru khou ngam nai kan di tho.’ Kumma Raguang rui maanse i ta damlou the; Kata luina; damlou the. Kame i rui nggaanme i le ntume i damlou the. (Genesis 1:26,27). “Khou te i ringpou Raguang rui kandi khou rui taniang laana mi khou te i rui manse i kasiam the. Kame i rui kanukuang khou ringme i thi u mbunlou tina maanse i te i ring the.” (Genesis 2:7).

2. Raguang rui Kana Npou Jisu ta ndiu guang lou khuan the maanse i mei ta paep khou rui gulou khang.

Poubaome i rui guang datnime i lam khou aniu rui pa tou e, “Kalam thu Raguang rui mbaan maanse i na ta heidi kam njianpui jang rui, Kana Mpou

akhatnamei ta tilou the. Thou pu ni Kakhou lummei guai thei dat maknga ringsuangmei latou khang e. Kalam thu Raguang rui Kana Mpou ta mbaan khou ndiu guangmei hei mbaan ta latjan su khang ramme; tiki kapaan rui mbaan ta kanlou khang e.” (John 3:16,17). Paul rui kumma hi e, “Tiki aniu paepmei su bam khou, Khrista aniu khang theilouna, Raguang kamei aniu ta adi njian cho tumei lianlolu the.” (Rom.5:8). Kum datlana, kamei rui sa e, “Mi hei, mei guaina kanloumei laa kanmei khatni nchummei ta thai kanmei ta la nimeipu, aniu ta kanloumeipu Raguang mikjuat khou gaime e khatni Kamei rui kahaomei e.” (1 Timothy 2:3-4). Aniu tuang ringbam lam khou kamei rui kumma hi e, “Kalam thu jaojian rui nangniu ta lummei paan rui kanlou the. Nangniu taan paan rui ramme; Raguang tuang kaipat de. Hei jaeng rui mi khang hei mei gaan khat na sini gaeng su khang maek ge.” (Ephesians 2:8,9).

3. Raguang rui aniu khou suaihiam kaguaina, bumaeng tuang khatni pum tuang, tilou the.

James rui hi e, “Gaime khatni nthuime kapaat guai hei tingkao thang rui, bunei, gaanchuangnga damloumeipu, kalaibammei sung rui tijing dat makmeipu Raguang rui ti keime kapaat re” (James 1:17). Paul rui sa e, “Aniu Poubaomei Jisu Khrista Pu khatni Karaguang ta thuanku kho! Kalam thu Kamei rui bumaeng suaihiam guai Khrista khou bammei aniu khang tilouna aniu ta tingkao kandi khou suaihiamlou the.” (Ephesians 1:3).

4. Kalingmei khatni ringmei Raguang akhatna de.

Raguang tuang akhatna sumei lam khou, Paul rui kumma kao ndao lou e, “Raguang akhat de. Kamei hei aniu guaina pu e, aniu guaina kaipou e, aniu guaina khou taan taanlou e, khatni aniu guaina khou bamme.” (Ephesians 4:6). Kamei rui kumma sadat he, “Kalam thu Raguang akhat nai e, khanti maansei ta Raguang khou jaikariulou datmeipu gaankhat nai e, Kamei kiu maansei Khrista Jisu” (1 Timothy 2:5).

5. Raguang hei bumaeng e.

Aniu rui John 4:24 khou kumma patou e, khui tei Raguang thu bumaeng de tuna. Lat biak khou sapu e thei, Raguang thu tei le jei ram makge. Kamei hei thu ndao pum ram mak ge. Kamei hei puat khatni ram mak ge. Aniu ruina Raguang hei bumaeng de tumei thai pu khou, Kata thai chui e khatni Kamei hei maansei mei thaek khou ramme tumei.

6. Raguang thu Jianmei de.

John rui sapat re, “Kakhou njianmei maekpui mei tei thu Ragang ta thai makpui mei de. Tabui cho tiki Raguang thu njianmei e. Kapaan rui aniu ringmei laa kan diu khang Kana mpou kalu akhat nahmei ta mbaan khou

ndiu guangna Raguang rui aniu ta njianmei lianlou e. Aniu rui Raguang ta njian tuang ramme; tiki Raguang rui aniu ta njianpui jaeng rui aniu paep guai tikuaklou khang rui Kana Mpou ta ndiu guang the. Njianmei kiu mi hei the. Njianmeithiu, Raguang rui aniu ta mi kumma njian e thei, aniu ni khat khat ta njian nipui thou e.” (1 John 4:8-11). Kamei rui sa the, aniu rui njianmei maek ge thei aniu khou Raguang ta thai mak ge kalam thu Raguang rui Kamei kahak hei aniu khou njianmei paan rui ndao lou e.

7. Aseini Raguang hei ring bamme.

Peter rui Khrista hei Raguangna mpou e tumei sadao lou e. (Matthew 16:18). Paul rui ringmei Raguang tuang phuamling lam khou salou e (1 Timothy 3:15). Kumdat lana kamei ruina kaniu tuang rammaeng khou rui reipatna chummei khatni ringmei Raguang lat piuna khatni siamruai sudat mei lam khou sadat he.(1 Thessalonians 1:9). Gaansaek rui Raguang hei theimei de tuna sa e, tiki tho theimei kiu thu kaniu guai tei the bumaeng khou. Raguang thu ringbamme. Khrista rui dinlou e, “ Ai hei Abraham Raguang, Isak Raguang khatni Jakob “Raguang e! Kamei hei theimei nun Raguang ramme, ring bammei nun Raguang de” (Matthew 22:32).

8. Raguang khou ramguaina ngam tura na de.

Jisu rui maansei nun khou thou tei gulou nu puni cho tuna samei gan khou tei Kamei rui kumma sa e, “Khoutei Jisu rui kaniu ta jaona sa the, ‘Mi hei maansei khang thu ngam mak khe, tiki Raguang khang thu ngam tu rana de.’ (Matthew 19:26).

9. Raguang ramma baihmei gaimei maek ge.

Khoutei Jisu rui kakhou da the, “ Tabui suna Ata meigaimei kao tu cho? Meigaimei khat sini maek ge; Raguang na de gaimei.” (Mark 10:18).

10. Raguangta maansei gankhatna sinni hou mak ge.

John rui kumma hi e, “Raguang ta houmei mei gaan khatna sini maek he; tiki kapu pam khou bammei akhat namei Na Mpou tei rui Raguang ta ndalou the.” (John 1:18).

Aniu rui thai e tumei thu Raguang hei maansei ta jao mak ge tumei (Acts 10:34,35),

Kamei rui nbaan nai thao rap khou rui ram kaguaina thai e (Acts 15:18), Kamei rui maansei lungning nkamloumei guai ta tei sinni latjan supuni Jisu rui (Romans 2:16), khatni Kamei rui ringsuangmei panti tilou ngam me (1 John 5:11). Aniu rui ntao sabammei Raguang hei thai ngam, houngam, chu ngam, kabam kathuina khou bam, ngam turana khatni kahoumei khatni nganmei ni maek. Kata kida khang mei baimei maek ge. Kamei hei ram guaina ta dammeipu e. Kamei hei kalummeipu, thuanlounimeipu, champou

lounimeipu khatni kahim tidailou rapnimei pu e ntao khatni tingsaeng jaeng khang.

Raguang rui Kata kalum khang lani e tiki Kamei rui gaankhat na ta sin-ni namma Kata champou khang su makge. Kata kumma taan kanmei guaita thu suaihiamlou puni.

Tiki tho, Kamei rui kalummei kathui ta lalou ni tuang ramme. Aniu rui Kata kalum e thei tho Kamei rui chunmei khou kalum pui ta e aniu rui ningmei ram maknga. Kamei rui Kata kalum khang lanimei ram kalum tei mathang tuang para nun khou hei hou puni.

LATTHAN

1. Maansei rui Raguang ta kalum me tumei tabui khou rui thai bo?
2. Rachap gei thang laan bamme tumei tei din no.
3. John 4:24 hei hi o.
4. Thouta maansei rui kalum khang cho?
5. Genesis 1:1 hei sa o.
6. Raguang hei nai e tumei asaek sa o.
7. Tabui rui Raguang him ndao bo?
8. Tabui kumma Raguang rui ngaanmei khatni ntumei damlou kan to?
9. Tabuijaeng Raguang rui Kana nbaan khou ndiu guang tu cho?
10. John 3:16,17 hei hi o.
11. Aniu khang thou theilou tucho?
12. Aniuta kumma gulou to?
13. Aniu tuang suaihiam hei bui thang rui guang tuang cho?
14. Ephesians 1:3 hei pa o.
15. Raguang tuang akhatna sumei khou Paul rui kumma sa bo?
16. Kumma nang rui Raguang lam sa khang tha?
17. Raguang hei njianmei e' tumei lam dinno.
18. Raguang hei asei ni ring bam dai? Kummei thiak khou?
19. Raguang khou ram guai ngam turana dai?
20. Thou tei gai cho?
21. Raguang ta mei houmei nai dai?
22. Raguang rui maansei zao jao bo?
23. Thou rui nbaan ta latjan su ni cho?
24. Raguang thiakriak asaek sa o.
25. Kummei ram kalum Raguang rui kahao bo?

PARA 4

KALUMMEI JAT/ KATHIAK

Kathanmei Latding khou pagutmei gan khou aniu rui kalummei hei kajat kathum phang nge. Mi para khou hei kalummei jat tei kathai puni the. Mi para khou rui kalummei hei akhatna ramme tumei nthanmei latrik rui aniu-ta tihning tou lou e. Kumma aniu rui Raguang rui kahaomei ram kalum tei phupat puni. Akhatni aniu daeng khou bam geimei nun rui kalum bammei ta ruina Raguang rui chunmei ram mak ge tumei thai puni the.

1. Nthanmei latrik rui thaimakmei ram kalum lam khou salou e.

“Paul Athen khou Silas le Timothy ta nkhuam bam khou, mi kaidai khou tei ramaeng rui padik bammei ta kamei houna kalung kabiou the, Kumma kamei sinagog khou Jihudimei nun khatni raning nthukmei nun le, khatni kaithian khou tingmik pum kamei le kadouchana ariumei nun le kathai ncham khu-
anne. Kumma Ipikuriamei, khatni Stoikmei ntakmei gaansaek rui ni kata lat adou khuan e. Gaansaek rui, ‘Lat pare bampui mei hei tabui sa ni lana cho?’ tuna sa the. Baimei nun rui, ‘Kamei hei kandih baimei ra nun lam dinpui mei khangji e,’ tuna sa the. Kalam thu kamei rui Jisu khatni theime khou rui ringthaomei lam din bam khuanne. Kaniu rui Paul ta jaina Areopagas kao-
mei meitin bam khou la guangnga, ‘Nang rui nchamloumei latdyn kathan hei tabui cho, aniu thai ni e. Kalam thu nang rui aniu nukuan khou ramkhat kadat datmei tichulou the. Hei jaeng rui lat guai hei tabui cho tumei aniu thai nii e,” tuna sa the. Athenmei nun khatni mi khou tei lung bammei gin nun tei lat than than samei ramme thei nkingmei khou kaniu kagan sumaan bam ni khuanne. Khou tei Paul rui Areopagas tuang meitin bam ma khou ding thaona sa the, “He Athenmeithiu, nangniu hei ram lam katana khou raning nthukmei nun e tumei ai hou e, Kalam thu ai tat ruanna nangniu tu-
ang kalumpui bam guai jao puki, ‘Thai makmei Raguang khou’; tuna karu khou hiloumei rachabam akhat hou e. Nangniu thai maknga kalum bammei kiu ai rui nangniu khou din bammei Raguang hei the. Mbaan khatni mi lung khou naime ram katana damloumei Raguang hei tingkao le kandi Kaipou e, kumma Kamei maansei baan rui kasiammei rakai khou lung mak ge. Khatni Kakhang ram ntang mak tuang nai e tuna maansei baan rui Kata siamruai su khang kage maek ge. Kalam thu Kamei rui ram katana khou ringmei thi khatni ram katana tilou e. Kumma kamei rui mei gaan khat khou rui maansei jat kapumma ta kandi nam ru kapum khou lung khang kasiamlou the. Ka-
mei rui dingloupui tuang kakum kagan guai le kaniu lung nipui ramrei guai damlou the. Kamei rui mi kumma suloumei hei kaniu Kata phu khang e, kumma kalam khou geina houpui thei laina Kata phu tou nu khang e, Kum

khuan sinni Kamei thu aniu kathui khou rui duna bam makg ge. Kalam thu, ‘Kakhou rui aniu ringna, kalung-kaguanna mei suna lung bam tuang e,’”. “Nangniu tuang latlu liangmei gaansaek rui ni mi kumma sa e, ‘Kalam thu aniu ni kana nun e.’ Hei jaeng rui aniu hei Raguang na nun suna, aniu rui Raguang hei kachaek rui, daandi rui, ram e thei, ntau rui maansei thiam rui kasiammei rahmaeng hei kum khuang e tuna aniu ning lak nina e. Heijaeng rui, ram thai makpui gan guai tei Raguang rui jao samlou the; tiki ntau thu Kamei rui kabam kathui khou maansei katana lung lai khang latdan patlou the. Kalam thu kamei rui kadah patloupui mei gaan khat paan rui mbaan kapum ta nchummei khou latjan su nipui Tingmik akhat nrianlou the tumei Kamei rui mipu ta kiu theimei khou rui tiring thaolouna mei kathui khou lianlou the.” (Acts 17:16-31).

Ntao Paul rui Athens khou tei ramaeng kalum bammei nun ta ariu kan the. Kamei rui mi tei nu makge tuna salouna kaniu khou tei kalingmei khatni ringmei

Raguang lam khou dinlou kan the.

Kumpuijaeng rui kaniu rui rammaeng kalum bam tuang? Kumpuijaeng rui gaankhat rui ramaeng khou nkhum kei bam khang? Rammaeng hei tau, thing, ntaan khou rui kasiam tuang nge, khatni mi guai tei ringmei khatni bu-maeng maekmei sinde. Hitei rui hou mak, chu mak, karim nam mak, kalung thai mak, kakhan thai mak, khatni suaihiam lou thai mak ge. Hi kummei maeng pang hei ram khat maeng su bam sinni, mi rammaeng ta tei kalummei ra khang la bam gei the.

Thaimakmei ram kalum kalum bammei nun na rui tingkao Raguangta thai mak nga, rammaeng ta kalum bam gei tuang nge.

Reikhou tei kumma aseidouni kandi kapum khou hei rammaeng kalum gei e. Tiki, kumpuijaeng ruai? Kalam thu akhatna de- thaimakmei jaeng ruai, echam-chammei jaeng ruai. Ram thai houmei ruina thu rammaeng ta kalum jat nitu ram makge khristianmei khou rui bam puni, khristian ram makmei thang rui bam puni.

2. Nthanmei lairik rui gaengmakmei ram kalum lam khou sa e.

Khrista rui sa e, “Ata Poubaoinei tuna kaomei kathuina tei tingkao guangdi khou gut rap ni tu ramme; tiki tingkao thang bammei Apu rui ningmei khou tatmei kameina tei rui gut khang de. Mi nung kiu mei mpeina rui ‘Poubaoinei, Poubaoinei, aniu nang jan khou ramundin kan tu ramma cho, khatni nang jan khou charinmei taan mpeina taan kan tu ramma cho?’ tuna sa puni.

Mi khou kiu, ‘Ai nangniu ta thai mak ge, nangniu latliammei nun, akhou rui tat kan o’ tuna ai rui kaniu khou sa puni.” (Matthew 7:21-23).

Mei guaina mah khou Poubaomei tuang mei nun ruina kathiak bai-baina kalum nu de, mi tei lungning nthanna kalumme thei Raguang rui lalou puni de tuna din bam gei e. Mi hei chum makge. Gaankhat rui kalummei tei maansei tuang riakdin theilaina kalumme thei, mi ram kalum tei gaeng makmei ram kalum khou de. Kabiak khat khou sa e thei, mi ram kalum tei Poubaomei rui lalou lakmei ram kalum e.

Maansei pang asaek rui Khrista jan khou kalum bam rapmei na rui lalou nu mei e tu khang ramme. Reimei khou, kaniu rui kaniu tuang denomination/kalangpatmei phuam jan khou kalum bam tuang khuanne thei, kaniu tei Khrista jan khou ram mak khe, kaniu tuang denomination jan khou di the. Mathangmei khou rui, denomination khou bam puijaeng rui kaniu tuang denomination/phuam tuang riakdin theilaina kalum kan puni the. Poubaomei rui sa e latjan tingmik nung kiu meigeimei rui Kajan khou taan aju taanlou kan tu ram cho tuna; tiki kamei rui khou tei ndao siak nga sa puni, kaniu rui Kalat piu makmei jaeng rui khatni Kakaikhun mei ram makmei jaeng rui kaniu ta thai mak ge khatni kaniu guai ta lalou ni turam mak ge.

Nang ram kalum tei maansei rui dingmei riakdin khou e thei, tumei thu, mi ram kalum thiak tei Baibal khou rui ram makmei ram kalum khuanne thei, nangram kalum tei gaeng makmei ram kalum di the, kumpui jaeng rui Poubaomei rui lalou ni turam mak khe. Kum the na nangphai lam khou hei phumin gut khang kage nai the.

3. Nthanmei lairik rui chummei khou kalummei lam khou sa lou e.

Kalummei lam khou Khrista rui sa lou e, “Raguang hei bumaeng e, kumma Kata kalummei guai rui bumaeng khou khatni nchummei khou kalum nina e” (John 4:24).

Aniu guai khui hei ram asaek thailou kho. Reimei khou, hu khoumei para khou tei Raguang ta kalum mei rui kabangbi daime the tumei kathai lou kan the.

Kaneimei khou, Kata kalummei guai rui Katuang ningmei khou na kalum khang nge tumei. Gaankhat na rui sinni Raguang ta kalum khang namphu su ni tuang ramme, tiki tho kata kalummei nun kaniu rui ningmei ram e thei gaankhat rui ningmei khou ramma ki, Poubaomei rui ningmei khou kalum khang nge. Kathummei khou, kalummei hei nchummei khou khatni bumaeng khou rui kalum khang nge. Hi kaba kiu thu tabui? Bumaeng khou kalummei tumei thu lungning nthanna, kaba thaina, khatni lungniamma kalummei tumei tuang nge. Khatni nchummei khou kalummei tumei kaba thu, hilou bammei nthanmei latrik/baibal theilaina kalummei tu tuang nge. Hi hei chala si di ding nge ni? Tiki, gaansaek khang thu mi hei chala rira de.

Kaniu rui kachap-kariak, kathiak-kariak, thoumung theilaina, tiki mi guai tei Poubaomei rui chunmei thu ram makmei thei laina kalum mei tuang. Kamei rui kata kalummei guai ruina lungning sing thang ruina Kamei rui danloumei latdan theilaina kalummei ta lani e. Kamei rui gei nbu mei ta ni nu mak, khatni rao mei ta ni nu mak ge. Cha rap tumei na ta de lanime.

Mi hei the Kathanmei Latding khou kalummei lam khou dinloumei, khatni aniu rui kaduan suna kathai kei pu khou, aniu rui hou puni hi kiu thu, hi thiak kumma thaorei khoumei Khristian nun rui kalum kanne tumei khatni aniu ni kumma kalum khang muai the. Aniu rui kumma kalum kanne thei aniu guai rui kalummei thiak hei cham kanni the khatni Poubaomei rui lalou puni e aniu ram kalummei tihei.

LATTHAN

1. Kathanmei Latding khou aniu rui kalummei hei kajat aju phang bo?
2. Mi para hei paa bammei lam asaek sa o.
3. Paul ruina Athens tihei kummei kaidai khang lalou kan bo?
4. Athensmei nun rui kalum bammei jat nun tei sa o.
5. Paul rui milam khou tei kumma sabo?
6. Paul tuang pari lung khou naime points nun tei hi o.
7. Kamei rui thou khou sou lou bo?
8. Kummei jaeng rui kaniu guai tei ramaeng kalum bam tuang cho?
9. Ramaeng hei tabui khou rui kasiam tuang cho?
10. Ramaeng rui taan ngam lakmei asaek phu pat ro.
11. Gaankhat rui chummei khatni ringmei Raguang ta thai e thei ramaeng ta kalum puni dai?
12. Aseidouni ramaeng kalummei nai di hai?
13. Matthew 15:9 hei hi o.
14. Matthew 7:21-23 hei paa o.
15. Gaengmakmei ram kalum tumei hei tabui tuang cho?
16. Khrista jan khou na gaankhat rui kalum rapmei tihei Raguang rui lalou puni dai?
17. Kummei ram kalummei ta Poubaomei rui kahao tuang dai?
18. Thouta aniu rui kalum khang?
19. Raguang rui kata kalum khang gaankhat ta namphu supuni dai?
20. Thou tuang chun khou aniu rui kalum khang cho?
21. Nchummei khou khatni bumaeng khou kalummei tumei kaba hei sa o.

PARA 5

THOUREIMEI KHRIATIAN NUN RAM KALUM

Maansei nun rui kumma kalum bam cho, tabui tun kalum cho, kummei gan khou kalum cho, khatni kalum khou tabui kumma taan cho tumei nun hei jaolou pu khou nungngai si de. Aniu rui masa thai e tumei thu aseï dou hei phuamling peina nai bamme khatni kathiak bai-baina kalum bamme tumei. Kumpuijaeng rui bai-bai bammei hei? Kumma bai-bai bam khang dina? Tabui kumma aniu rui thai khang aniu rui kalum bammei thiak hei Kamei rui ningmei khou kalum bam tuang nge tumei? Gailiangmei thiak pang khou tei thu aniu nthanmei latrik khou jaona khatni thaoreimeï khristian nun rui kumma kalum kan tucho tuna jaomei hei the.

Pentecost nung phuamling lingthao kanmei tang, hiloumei ruanri rui sa e, “Kaniu tei latdiumei nun rui nchamloumei khou, phuam kariumei khou, tujang kariumei khatni huaineimeï khou lung gutna bam khouanne.” (Acts 2:42). Jiab nun tei Apostles nun riakdin khou tei taekmak nga katipma kum tat kei bam khouanne. Kaniu rui tabui taan kan to? Kalum kanmei kaguaina thu hilou makge ki kathum thu hilou e. Hi kiu thu- katinmei ram e thei tipatmei, ntian subakmei/Poubaomei taektu khatni kalummei, hi nun khou hei kaniu rui katipma taan bam khouanne.

Katang dat khou Paul rui chaengkaem Troas khou tat ruan guanglouna khatni khou tei bam khan louna hi tunmei phuamling/khristian pang khou tei kalum nchamlou kan khouanne. Aniu rui kumma patou e, “Kumma neidak tuang reimeï nung ntian tu kariu khang aniu guang kaduai khou, Paul rui meï nun khou lat sa khouanne. Kumma kamei nthuan thaona kaam thao dat khang ning lana, kamei rui jipchuang ngan nchamlou khouanne.” (Acts 20:7). Hi khou rui aniu rui thai e kalummei tingmik hei nitdak tuang reimik tingmik khou e tumei. Paul kamei hei nitdak tuang kaneimeï tingmik nung mi bam khou hei guang tang bam nu e, tiki, kalummei dam tei lacham nu khang ruina kamei rui khouitei nei kanak bam tuang khouanne, nitdak tuang nkhammei tingmik ta ganlouna, Poubaomei tuang meï le tuna kalum katin khang ruina Poubaomei tuang tingmik ta nkhuanna bam kan pui tuang nge. Nbuna, khou hei sa lou e, mi tingmik hei jiab nun/khristianmei nun rui ntian subakmei taan ram e thei Poubaomei taektu tei tu bam khouanne tumei. Nkhammei khou, Paul rui mi kagan tihei chamlou/dinlou khang lalana, katang khou kamei rui kachaeng luan tei kumma tat dat kan the.

1 Corinthians 10 le 11 khou Paul ruina chana nun khang Poubaomei taektu lam khou nthuknga hilou e. Aniu rui thailou kho: “Ai rui nangniu khou dinlou kanmei tei Poubaomei rui saloupui lat re. Mi kiu thu: Poubaomei Jisu,

kata tinim nimei jingbang tei, ntian dum akhat laana, Raguang ta thuankulouna, hei tei nbi baknga, sa the: ‘Mi hei nangniu khang tipatloumei apum the. Ata ningtou khang mi hei tu o’. Hei tei kumma, jingbang naptu tu tang pu khou, Kamei rui buang akhat laana, ‘Mihei ajei rui suloumei latding than tuang buang e. Nangniu mi hei jangpui kathui ata ningtou khang taan o’ tuna sa the. Mi kiu thu, nangniu mi tian hei tupui kathui khatni mi buang hei jangpui kathui Poubaomei theiloumei ta tei, kamei guang mak saan din ndao bam tuang e. Mi ru khou rui, thou pu ni Poubaomei tuang tian tei tu biuh maknga tupui mei khatni katuang buang tei jang biu maknga jangpui mei tei, Poubaomei pum khatni Kajei ru khou nkhuaipei mei e. Hei jaeng rui, mei kathuina kalam kalam khou kakhan rei lana ntian tei tu kan diu khatni buang tei jang kan diu. Kalam thu kamei rui Poubaomei pum tuang kaba tei thai maknga ntian tei tu pu khou khatni buang tei jang pu khou, kamei hei tei tumei khatni jangmei tei rui karana karu khou latjan phung guang bam tuang e. Hei jaeng rui nangniu mei mpeina nnao sunu bam tuang e, kumma mei gaansaek thu thei kan the.’ (1 Corinthians 11:23-30). Ntao thu kadaisumei latbam asaek aniu rui kaluan suna hi kei jao kho:

1. Paul rui mihei Poubaomei khou rui latou kan pui tuang nge.
2. Kamei rui ntian tei Poubaomei pum khin sumei tuang khatni buang tei ruina Khrista jei khin sumei tuang nge na salou e.
3. Mi hei Poubaomei tuang pum khatni jei ta ningtou khang nge.
4. Kumma taan mei rui Poubaomei theiloumei ta ndao bam tuang nge Kamei rui guang dat mak saan khang.
5. Thou thou puni biu makmei thiak khou, lumlou makmei thiak khou, tuhmei akhatni jangmei kamei karana karu khou latjan phung guang tu the.
6. Tu jang makmei hu khou, kabumaeng tei tabui kum bam cho tumei kamei-kamei rui chaeng jao rei khang nge. Mi kaba kiu tho, kamei tei paep khou lung bam khouanne thei, hitei ganpat rei lana Poubaomei taektu tei tujang khang nge. Gaankhat rui mi taektu tei tubiu makmei subam khouanne thei, kamei tei ni Poubaomei khang ring bam khang biu makmei lik ge. Kum-puijaeng ruina, gaankhat panti khou biumakmei khou bam khouanne thei mi tei su ntun reina lung khang nge khatni kumlana, Poubaomei taektu tei ni kum tu muai khang nge lumloumei khristian akhat suna.
7. Poubaomei tuang maansei nun rui Poubaomei tuang taektu tujang makmei hu khou, kapum kapum tei sianriap thai khang Paul rui dinlou e. Raguang rui lungning ta jao e, aniu ruina thu hou tang thui mak ge. Kumpui jaeng ruina tujang nimei pui/pu ruina kakhan thaina taan pat khang the Bai-bal rui dinloumei theilaina taan ngam khang tei. Aniu rui gaankhat ta latjan

su khang ngam tilou mak ge. Ki, kapum-kapum rui Poubaomei rui ningmei/Baibal rui samei khou taan khang the.

Paul rui 1 Corinthians 11 khou Corinthiansmei nun ta nphut ran si lou kan the, kalam kiu thu kaniu ruina Poubaomei taektu ti hei khumngai kumma subam tipui jaeng rui. Kamei rui dinlou kanne, tujang khang thu kaniu kai-kai nai gei the. Kum thena Poubaomei taektu ti hei nbaan tuang taektu kumma tu khang ramme tuna dinlou kan the. Mi tei kumma aseï dou ni kummuai e. Khristianmei rui lungning kachang kasi na kalum khang nge. Poubaomei taektu-ntian le drakha dui-tujang bammei hei ram baimeï khou ram makge, ki Poubaomei theiloumei khatni kajeï aniu khang rui keilou meita ningtou khang nga de, baimeï tuang akhat sinni maekge.

Kumdatlana, aniu ruina 1 Corinthians 16:1,2 hei jao gut pukhou, hihmei ruina tipatmei lam khou hi loumei ariu e. Kamei rui kumma hi e, “Nthanmei nun khang nkhalou khang sian kakhamei lam khou thu, Galatimeï phuamling guai khou mi kumma su o tuna ai rui sa kanmei kumma nangniu ni su nina the. Ai guang pukhou kakha dat bam mak khang, kamei kamei rui ntaan guangmei thei laina neidak tuang reimeï tingmik nung nangniu mei kathuina rei patna lou kaduai bam nina the.” Kum datlana kumma kamei rui hi dat di he, “Linglou raomei nun tei tai guang rao puni, linglou geimeï nun tei tai guang gei puni tumei hei ningtou lou o. Mei kathuina kamei kamei rui dingloumei thei laina ti kan diu. Nja na, ti mak nu mak khe tuna ti rio; kalam thu neilana tipui mei ta tei Raguang njianne.” (2 Corinthians 9:6,7). Tilou bammei nun khou rui thai the kiu thu Raguangmei nun tipat khang nge.

1. Kaniu guai rui neidak tuang reimeï tingmik nung taan khang nge.
2. Khristian guai na rui tipat khang nge.
3. Kaniu guai rui latoumei theilaina tipat dat khang nge.
4. Kaniu tuang ram ti tei kaniu rui phangmei/latoumei chuat khou tipat kan khang the. Tithe lam khou Kathanmei Latding khou sa mak ge kasing ni heïju ti khang tumei salou mak ge.
5. Kaniu rui kaniu tuang lungding lalouna heïju tini the tuna dingloumei tei ti khang the.
6. Kaniu rui tijina ti lak ni na re khatni tang gaimak nga/ti mak tunu makge na ti khang ramme khatni namma ti khang ram mak ge.
7. Ki tho, tinina, neilahna ti khang nge, kalam thu Raguang ruina tinina, neilahna timei ta kahao kuanne.

Lusuanmei lam khou hei Kathanmei Latding khou geisi nai de, Paul kanei Silas rui kangkai khou lu sauna Raguangta thuanna bammei ni naie e (Acts 16:25), tiki, Poubaomei nun ruina thu hapta tuang reimeï tingmik nung lu

suan khang katin bamme tumei thu ariu mak ge. Kum bam khuan sini na tho, nthanmei latrik himeipu ruina tho khristianmei ta lu suan khang latdan ti lou e (Ephesians 5:19; Colossians 3:16), akhatni kum puijaeng rui lu suanmei hei ni kalummei tuang kaduan akhat suna khristian tingkum phai lung khou mei nun rui su bam khuan the.

Ntao tho miguai hei lou katin lou kei pu khou aniu rui phang the- Poubaomei tuang maansei nun rui hapta tuang reimei tingmik khou hei kalummei, kathaime, lu suanmei, Poubaomei taektu tumei, akhatni tipatmei taan guai hei taan bam khuan ne tumei. Aniu rui baimei thiak ariu mak ge. Rachap tuang rammakmei lairik nun aju khou ni kumma hilou bam lik khuanne. Kum thena aniu rui thai the khristianmei nun guai ruina kum subamme tumei hei Poubaomei ta kalummei gan khou. Kumme thei tho aniu ni kum khang ram mak dai?

LATTHAN

1. Phuamling gei thang kumma kalum bam bo?
2. Kumma aniu rui thai khang aniu rui Poubaomei rui kahaomei thiak khou kalum bamme tumei?
3. Pentecost nun phuamling lingthao loumei tang kum kan tha?
4. Acts 2:42 hei hi o.
5. Jiab nun rui tabui khou taek maknga tat kei bam kan?
6. Khui hei kalummei kaduan guai tei hilou dai?
7. Kumpuijaeng rui Paul rui Troas khou tingmik asaek khan lou kan tu cho?
8. Acts 20:7 rui kumma sa bo?
9. Hapta tuang kummei tingmik nung khristian guai rui katin kan bo?
10. Kaniu rui taan kanmei taan nun asaek sa o.
11. Korinthians mei nun hei akummei nun cho?
12. Paul rui Poubaomei khou rui tabui latou kan bo?
13. Tabui khang rui kaniu ruina ntian khatni buang (drakha dui buang) tei piu kan tuang cho?
14. Hei rui tabui lian bo?
15. Kummei thiak khou rui gaankhat rui biu makmei thiak khou sinsu nu bo?
16. “Mei kathuina kalam kalam khou kakhan rei lana ntian tei tu kan diu khatni buang tei jang kan diu” tumei kaba hei din no.
17. Gaankhat rui karu khou karana nkhuamei khou ti jang keilou nu dai?
18. Lummei khat sulana, Poubaomei taektu tumak nu dai?
19. Poubaomei tuang maansei nun rui diangmei taektu tu nu dai? Nu mak ge thei kumpuijaeng ruai?
20. Kumpuijaeng rui Paul ruina Korinmei nunta loukeina Poubaomei

tuang taektu lam khou sa kan tu cho?

21. 1 Corinthians 16:1,2 hei pa o.

22. Kummei tingmik khou khristianmei nun rui lou kaduai bam khang cho?

23. Aju dou ti khang?

24. Kum kummei kaniu rui tikhang?

25. Kaniu rui tinimei sing tei sa o.

26. 2 Corinthians 9:6,7 hei sa o.

27. Kumma tipatmei ta Poubaomei rui lani bo?

28. Kalummei duan pangu tei hi o.

PARA 6

KALUMMEI TINGMIK

Kathanmei Latding khou aniu rui kalummei hei kathuk nai e tumei na ram maknga, Poubaomei rui kummei tingmik nung kalum khang katin katinmei ta kahao cho tumei dinne. Hi kiu tabui tingmik ta cho?

Gaansaek rui Sabbath nei hei kalummei tingmik suna aseï ngan na maan-sei ta sin bam di he tuna dinne. Mi hei nchum puni dai? Kum mak khe kariak latdan tei lagan kan puijaeng ruai, khatni 2 Corinthians 3; Colossiana 2:14; Hebrews 9:16,17 khatni Hebrews thei laina. Paul ruina Jehudihmei nun tei Sabbath nei nung tei ariu kan de tuna agi bamme. Ariu kanne tumei thu chumde, tiki, tabui tun tei kalum katin khang rui e tuna salou mei nai bo? Kalingnga tho kamei ruina Raguang chun dinlounu khang kadouchamei la pui tuang de.

Sabbath nei hei kalummei tingmik ram makge thei thu, kummei tingmik nung puni the na? Aniu rui Latding Than hei phitgut mei gan khou kabam akhatna ram maknga mi latthan tuang latdao ariu e. Reimeï khou, aniu ruina kathanmei latding tuang khristian nun pang rui kalum khang katin kanmei khatni kaniu rui kummei tingmik khou kalum katin khang kada kan tucho tumei hao puni. Latbam khang kiu, Paul ruina Troas kaidai tat ruanmei gan khou kamei ruina jaeng asaek khristianmei nun ta ariu nu khang ruina khui tei bam kei kanne tumei nphang nge. Ntao aniu rui pa kho: “Kumma neidak tuang reimeï nung ntian tu kariu khang aniu guang kaduai khou, Paul rui mei nun khou latsa khuanna. Kumma kamei nthuan thaona kaem thao dat khang ning lana, kamei rui jipchung ngan nchamlou khuanne” (Acts 20:7). Njianlouna Acts 20:6 hei jao lou kho mi rui samei Paul rui Troas khou tei jaeng chaneï bam lou kanne. Mi kaba thu kamei ruina Sabbath nei ram-methei Thangja nei khou ni bam lou the, tiki, kamei ruina khristianmei nun ta Sabbath nei ariu kanne tumei thu sa makge , ki neidak tuang reimeï ting-

mik /Sabbath tang reimei tingmik nung ariu kanne. Khui hei thai lounimei kiu tabui tuang? Mi khou rui thaimei thu kamei rui khou tei bam khanlou kanmei tei Sabbath nung kalum khang ram makge tiki, neidak tang reimei tingmik nung Poubaomei rui tiloumei tingmik, khou kalum khang bam lou kan pui tuang nge.

Neidak tuang reimei tingmik kiu tabui si dina? Gai the, kariak latdan theilaina Sabbath nei hei neidak tuang chaneimei tingmik su the. Hi kiu thu neidak khat khou jaeng chanei nai e thei thu neidak tuang reimei tingmik hei Sabbath nei tang ta the. Kumma ntao gan khou tho mi tingmik tihei Sunday/ nongmaijing tuna kao the kumma mi tingmik ti hei neidak tuang reimei tingmik tuna hilou the.

Kumpuijaeng rui neidak tuang reimei tingmik? Kariak Latdan khou tho, Sabbath nei hei neidak tuang nkhammei tingmik su the. Khrista tuang riakdan bang khou tho Sunday, ram e thei neidak tuang reimei tingmik hei kalummei tingmik su the. Hi kaba tho Poubaomei hei nkhammei ram mak khe, reimei di the. (Matthew 6:33).

Kumma kaduan suna kaneimei khou Paul ruina Korinmei chana nun khou kaniu rui tipat nimei khou din loumei tei thai lou kho. Pah lou kho: “Nthanmei nun khang nkhalou khang sian kakhamei lam khou thu, Galatimei phuamling guai khou mi kumma su o tuna ai rui sa kanmei kumma nangniu ni su nina the. Ai guang pu khou kakha dat bam mak khang, kamei kamei rui ntaan guangmei thei laina neidak tuang reimei tingmik nung nangniu mei kathuina rei patna lou kaduai bam nina the” (1 Corinthians 16:1,2). Tiki, tabuijaeng khou ruina mi tingmik nung hei kaniu rui lungpatmei/lunggai patmei theilaina tipat khang kadah kan tuang cho? Kalam tho,mi tingmik tei kalummei tingmik akhatni mi nung hei kaniu ruina katin nimei tingmik ni the kum timei jaeng ruina kaniu ruina tipat kaduai khang ni kadou chamei tingmik su lik khuan tipuijaeng rui e. Kum khuanne thei,kalummei tingmik hei Sabbath nung khuanne thei tabui khang jaeng neikhat thao dat na kaniu rui katin dat khang khatni tipat kaduai khang kamei rui kumma sabam puini na cho? Kabiak khat thang sadat pukhou, Poubaomeita kalummei tingmik hei thangja/Saturday nung khuanne thei, nungmaijing/Sunday nung kaniu kaniu ruina katin dat lana tipatmei taan hei taan dat Poubaomei latdan theilaina tipatmei taan kiu taan dat bam dai? Kummak e thei, kum pui jaeng ruai?

Kataang dat khou John ruina neidak tuang reimei tingmik tihei Poubaomei tingmik tuna salou dat kanne. Kamei rui kumma sa e, “Poubaomei tuang tingmik nung ai bumaeng khou bam khuanne. Khou tei bianggun khuan kumma ranmei khuan akhat rui athei thang rui sa guang khuanne” (Revelation 1:10).

Tingmik kathuina Raguang tuang tingmik ge tumei ni chum de, ki, mi tingmik tihei nthukmei tingmik suna sa lou khuanmei hei ram akhat nai tina e. Khui hei Poubaomei tingmik tumei hei kalummei tingmik ram e thei, neidak tuang reimeis tingmik tina e. Kum mak khuanne thei kamei rui tabuijaeng khou rui mi tingmik tihei Poubaomei tuang tingmik tuna sa khang?

Tiki, neidak tuang reimeis tingmik hei adikamma kha nthukmei tingmik tina? Kalingmei rammakmei khou, salou kanmei tei kumma, Kariak Latdan tei kalai lana, ntao thu Poubaomei ruina reimeis su the. khatni kalam baimeis peina nai gei de mi tingmik hei adi kamma kha nthuk cho tumei.

1. Khrista ruina neidak tuang reimeis tingmik nung ringthao dat kan khuanne. Poubaomei ringthaodatmei tingmik nung laothuan, hiloumei rui sa e, “Sabbathnei tang, neidak tuang reimeis nung khuanpaeng pat pukhou Magadalenis Meri le baimeis Meri tarou jao khang tat the” (Matthew 28:1). Hinung tei kanak khat tumei tang, aniu rui kumma patou e, “Mi neidak tuang reimeis nung jingbang tei, jiap nun tei Jihudimeis kapu nun ta ping lana, kaikham mbang lou na kainung khou bam khuanne. Khoutei Jisu guangna kaniu pang khou dingnga, ‘Nangniu khou chujaengmeis nai diu!’ tuna sa the.” (John 20:19).

2. Jisu ruina jiab nun khou neidak tuang reimeis nung ndao lou kanne.

Jisu ruina tarou khou rui thao datna khatni Kajiab nun khou neidak tuang reimeis tingmik nung kahak tei ndao lou, khatni mi tingmik nung kahak hei mei baimeis nun khou ni ndao lou muai kan ne. Kumma sa e, “Jaeng tachat tang, jiab nun tei kainung khou bam dat khuanne, kumma mi pang khou tei Thomas ni bam khuanne. Kaikham guai tei taanlou de, tiki, Jisu guangnga kaniu pang khou dingnga, ‘Nangniu khou chujaengmeis nai diu!’ tuna sa the.” (John 20:26). Jisu ruina neidak tuang reimeis tingmik nung jiab nun khou ndao loumei tang jaeng tachat tang kaneimeis suna Kamei rui ndao dat rei thei tabui tingmik nung puni tha? Neidak tuang reimeis tingmik nung rap di the. Tabuijaeng khang rui nthanmeis latrik rui hei kumma sadat sadat bam tuang cho? Kalam kiu tho, mi tingmik hei Khrista tuang latdan bang khou tho kathuk nai hakmeis tingmik su puni tina re. Mi tingmik hei kalummeis tingmik supunimeis jaeng rui e.

3. Phuamling neidak tuang reimeis tingmik nung lingthao lou e.

Pentecost tingmik hei kanpatmeis ngai tang jaeng 50 meis tingmik ge khatni Poubaomeis rui tarou khou rui thao datmeis tingmik ge. Poubaomeis ruina neidak tuang reimeis tingmik nung ringthao dat re thei khatni Pentecost hei jaeng 50 tang e, kumme thei tabui nung Pentecost hei ta puni tha? Neidak tuang reimeis tingmik nung the. Tiki, Pentecost tingmik hei adi kamma kha

kathuk naimei tingmik su tina? Hi lam khou hei tho, Pentecost hei neidak tuang reimei tingmik nung bam khouanne akhatni mi tingmik nung kahak hei phuamling ni lingthao lou muai e. Hei tei na rammaknga, nthukmei taan aju heinung hei taanpat kanne reiliangmei suna khatni hi nun guai tei ruina kalam akhatna khou ntun guang lou e. Latbam khang kiu, Bumaeng Nthanmei mi tingmik nung keilou kanne, gaicham tei reimei suna hi nung hei din ndao pat lou kanne, reimei suna gulou kanmei bumaeng guai ta phuamling khou lou kariu lou kanne. Kumpuijaeng khou ruina, hi nun guai taanpat/guang lou kanmei tihei jaosam lou nu makmei nai e.

Kachang nga ntao thu aniu ruina Poubaomei neidak tuang reimei tingmik nung tihei kadah lou e Kata kamei nun guai ruina kaduai katinna kalum khang. Thaoreimei khristain nun guai ruina mi tingmik nung hei kalum bamme tumei lianloumei, mi nung hei kaniu guai rui tipat khang ni latdan dan lou the, mi guai ruina aniu khou kasuak-kaguakmei guai tei lagan lou ngam the. Ningtou lou kho, Poubaomei tihei ram lam kaguai na khou reiliangmei su ni na e. Kum tipui jaeng khou ruina, neidak tuang reimei tingmikpum khristianmei guai ruina Kamei rui theilouna neidat tuang reimei tingmik nung ringthao datmei ta ningtouna kalum bam khang the.

LATTHAN

1. Kalummei tingmik hei nthukmei tingmik su dai?
2. Poubaomei rui Kamei nun khang jaeng neikhat kalum khang reipat lou bo?
3. Sabbath nei hei ase ngan aniu ta bang bam di hai?
4. 2 Corinthians 3; Colossians 2:14; Hebrews 9:16,17; Hebrews 10:9; and Luke 24:44 nun rui tabui din bo?
5. Tabuijaeng khou ruina Paul ruina Sabbath nung Jehudimei nun le katin kan tuang cho?
6. Khristian mei nun ruina kummei tingmik nung Acts 20:7 khou katin kan bo?
7. Sabbath nei hei kalummei tingmik khouanne thei, tabuijaeng khou rui jiab nun ruina neidak tuang reimei tingmik nung kalum kan tucho?
8. Neidak tuang reimei tingmik hei tabui cho?
9. Tabuijaeng khou ruina neidak tuang reimei tingmik nung hei kalummei tingmik khang kadah kan tucho?
10. Corinthiansmei khristian nun rui tipat khang katin kanmei tingmik tei sa o.
11. "Poubaomei tuang tingmik" lam khou sa o.
12. Tabuijaeng khou ruina neidak tuang reimei tingmik hei kathuk nai

kan tuang cho?

13. Kummei tingmik nung Poubaomei rui tarou khou rui ringthao dat kan tucho?

14. Pentecost hei tabui tingmik nung ta kan bo?

15. Pentecost nung pat kanmei nun tei hipat ro.

PARA 7

KALUMMEI THIAK

Aseidou hei kandi khou hei kalummei thiak hei geisi nai bam the. Catholics mei rui kaniu tuang kalummei thiak baina nai bam the, kumma protestants pang ni kaniu tuang kalummei thiak bai-baina nai bam muai the. Hi kaba thu, nang ruina mi guai khou hei tat bamme thei neidak aju gut puni the. Kum bammei hei tabuijaeng ruai? Mi hei Poubaomei rui ningmei thiak dai?

Baibal rui dinne phuamling hei akhatna de khatni mi tei Poubaomei tuang nge tuna (Ephesians 4:4; Matthew 16:18). Phuamling tuang thiak-riak thu Kathanmei Latding khou nai the. Mi hei chummei jaeng rui, khatni Poubao-me i tuang puijaeng ruina, khatni Kamei rui kalum latdan danloumei jaeng rui, kalummei thiak ni kachaeng akhatna muai ni na the.

Poubaomei rui Kamei nun ta kummei thiak khou kalum khang kahao cho thai khang Latding Than thang han guang nga jao khang the. Mi tei ramma baime i chaeng mak ge thai khang. Khou tei aniu rui tatna jao pukhou ruina Poubaomei rui kahaomei tei phang khang di the. Mi tei rui kabang khou mei nun hei lianlou e:

1. Kalumnime i hei Raguang ta e.

Khrista ta rasi rui nthiamme i gan khou Kamei rui kumma sa e, “Tat kan no, Seitan! Nang Raguang Poubaomei ta kalum nina e, katuang siamruai na su nina e.” (Matthew 4:10).

2. Kalummei tingmik hei neidak tuan reime i tingmik suni na re.

Jiab nun guai ruina neidak tuang reime i tingmik nung lou kaduai bam khang latdan ti kan ne: “Ai guang pukhou kakha dat bam mak khang, kamei-kamei rui ntaan guangme i thei laina neidak tuang reime i tingmik nung nang niu mei kathuina rei patna lou kaduai bam nina the” (1 Corinthians 16:2).

3. Khristian mei rui Poubaomei ta kalum khang nge.

Mi lam khou hei aniu rui sa ngachap khang nai gei e: “Kaniu tei latdiu-tatme i nun rui nchamloume i khou, phuam kariume i khou, tu jang kariume i khatni huaineime i khou lung gutna bam khuanne” (Acts 2:42). “Kumma neidak tuang reime i nung ntian tu kariu khang aniu guang kaduai khou, Paul rui mei nun khou latsa khuanne. Kumma kamei nthuan thaona kaam thao dat

khang ning lana, kamei rui jipchung ngan nchamlou khuanne” (Acts 20:7).

4. Kumma kalum nicho tumei aniu khou salou e.

Khrista rui sa e, “Tiki kalum changmei guai rui Puta bumaeng khou khat-ni nchummei khou kalum nipui gan guang the, ntao hei the; kalam thu mi kumma kalumpui mei ta tei kata kalum khang Pu rui phu e. Raguang hei Bumaeng e, kumma kata kalummei guai rui bumaeng khou khatni nchummei khou kalum nina e” (John 4:23,24).

5. Kalummei tuang kalang 5 (pangu) hei nthan thiak nga hilou e.

Mi khou hei Baibal kathaime i ni kajao the. (2 Timothy 2:15), Kalummei (Acts 2:42), Lu suanmei (Ephesians 5:19), Poubaomei taektu (Matthew 26:26,28), Tipatmei (2 Corinthians 9:6,7). Milang nga hei de Latding Than khou kalummei tuang kalang/dam naime i. Aniu ruina kalummei kagan khou hei lung khou na hei su khang nge.

6. Aniuta kalummei khou katipma kariu bam khang salou e.

Hebrew hime i pu rui kumma sa e, “Mei gaansaek kaniu cha su bammei tei kumma, aniu guang kariumei khou ntaem ri kho. Poubaomei tuang tingmik ana guang the tumei nangniu houpui thei laina aniu khat-khatta katiu thao mbu hai-hai bam di kho.” (Hebrewa 10:25).

7. Kalummei thiak thu chala si de khatni kalam hei nthanthiak de. Gaankhat rui kalum khang hei kung pui tuang ramme. Meiguaina ta kalum khang kabai e.

8. Kalummei duan hei Poubaomei latdin khou rui kabi su khang nge.

Aniu ruina Raguang latna sa e. (1 Peter 4:11). Raguang rui kumma sa e tumei lat hei kajao mak nga nu mak ge.

Khrista Phuamling ruina thu bailat lat re baime i nun le tuna kalam thu Kathanmei Latding theina laina kalum tina. Kumpuijaeng khou ruina thu baime i thiak riak nai thuai timakmei jaeng rui baime i phuam le tuna thu bailat lat the. Lat bam khang kiu kabang khou mei nun hei maek ge Khrista Phuamling mei ruina:

1. Lusuanmei gan khou baan rui kasiammei puat/mechanical instrument sinsu na kalum mak ge. Latding Than ruina nthan-thiak nga dinlou e muang ruina thuanmei lusuanna Raguang ta thuan khang. Paul rui sa e, “Nangniu khat khat khou kalumlu, himthuan lu lat tei a suan kari o; khatni nangniu lungsing rui thuanna kalumlu khatni himthuanlu Poubaomei khou suan lou o” (Ephesians 5:19). Aniu rui milam khou hei lusuanmei para khou nbuna salou dat puni the.

2. Aniu meiguaina khang Poubaomei taektu hei laan lou mak ge. Hi phaen tei Paul rui kumma Corinthmei nun khang hi e, “Heijaeng rui, mei

kathuina kalam kalam khou kakhan rei lana ntian tei tu kan diu khatni buang tei jang kan diu” (1 Corinthians 11:28).

3. Aniu rui tithe ti makge. Paul kumma sadat di he, kaniu rui latoumei chuat khou tipat khang. (1 Corinthians 16:2).

4. Aniu rui tipatmei taan hei Poubaomei tuang tingmik ram makmei tingmik khou taan mak ge. Phuam geisi ruina kaniu katinmei gan khou, Poubaomei tingmik ni kiuram mak ni, thai mak nga tipat bam khouanne. Tiki, khristianmei ta tipatmei hei thu neidak tuang reime i tingmik nung tipat khang nge. (1 Corinthians 16:2).

5. Aniu ruina choir ram e thei lusuanmei kalang bailat latmei maek ge kalummei gan khou. Nthanmei latrik rui phuamlingmei guai rui lu thuanmei lu suan khang salou e. Paul rui sa e, “Ai mei thai makmei lat rui huainei e thei, abumaeng rui thu huainei the, tiki hei tei alungning khang thu kabah maek khe. Kum e thei, ai tabui kumma su nina cho? Ai abumaeng rui huainei puni, kumma alungning ni kajaona huainei puni; abumaeng rui ai lu suan puni, kumma alungning ni kajaona suan puni.” (1 Corinthians 14:14,15).

6. Aniu khang nthukmei kalummei tingmik baina nai thuai mak ge Easter, Christmas kummei. Paul rui suriak lou e Galatia mei chana nun guai ta, ‘Nangniu tingmik, bu, kakum kagan khatni tingkum tu ngaek bam e. Nangniu khang ntingloumei ajaeng guai hei nsa maan nina ni tuna lung kadan tuang nai e’. (Galatians 4:10,11).

7. Aniu rui Poubaomei taektu bu khou tuguai, bu thum khou tuguai, ram e thei tingkum khou tu guaina mak ge. Aniu rui Sunday /neidak tuang reime i tingmik pum tu e. Aniu rui patou e khristian su rei mei nun rui kumma su kanmei tei (Acts 20:7). Kummei neidak tuang reime i tingmik tai? Thou khou ngam tilouna cho kummei neidak tuang reime i tingmik cho tuna than khang? Neidak pum reime i tingmik nai e, khatni mi tingmik khou tei e aniu ruina Poubaomei taektu hei tu nime i. Aniu rui Poubaomei taektu hei aniu rui katin meipum tu khang nge, kathai khang nge, khatni bai-baime i nun guai tei le tuna.

8. Aniu ruina chapriak, kathiak –kariak nai thuaina taan mak ge Poubaomei ta kalum khou. Pitar rui sa e, “Nangniu ta, nangniu pou nun khou rui laamei tuang gaeng makmei panti lunlung khou rui thuakpatloumei hei maan kan nime i daandi kachaek rui ramme tume i nangniu thai e” (1 Peter 1:18). Paul rui ruini haplou datna sa e, “Khrista khou rui ramma, maanse i tuang ra kadai keime i pari khou rui khatni mbaan sinme i bumaeng nun khou rui guangmei tuang gaeng makmei meiguatmei maanse i tuang ningting tei rui nangniu ta bang tisu dat mak khang ramthai o” (Colossians 2:8).

9. Aniu rui maansei tuang riakdin khatni latdan khou tat makge. Jisu jiab rui hi e, “Nangniu Khrista le thei cham the kumma mi mbaan sinmei bumaeng guai khou rui thei the. Kumme thei nangniu tabui suna mi mbaan tuang kumma lung bam tu cho? ‘Mi hei sin riu’, ‘mi tei mbap riu’, ‘hei tei kahi riu’, tumei riak guai hei tabui suna ngaek bam tu cho? Mi guai hei kagan akhat khou tat bam khuanmei maan kanmei, maansei rui kasiammei riak khatni latdin e.” (Colossians 2:20-22).

10. Aniu rui Latding Raan tuang latdan thei laina kalum mak ge. Meigeisi rui kummei khou tei ngang louna kalum bam khuanne, Sabbath, rudam timei, baan rui kasiammei baansin sinna lusuanmei, kummei pang hei, tiki, mi kummei hei Raguang latkaeng ta sinsu laan mei e. Kariak Latdan rui aniu ta sin dat mak khe (2 Corinthians 3; Hebrewa 10:9; John 1:17).

Kumpuijaeng ruina aniu ruina Latding Than theilai khang the haploumei tuang maek nga, lagan mei tuang ni maek tuna. (Revelation 22:18,19; Galatians 1:7-9). Latding Than ruina gaitaan taan khang nthuina tilou the. (2 Timothy 3:16,17). Ring khang khatni gai khang hei mi khou tei ntang nga nai the. (2 Peter 1:3).

Meiguaina ruina mithiak khou hei hanguang datna kalum khuanne thei, khatni kaniu ruina rachap jan khou sabammei guai tei taan khuan ne thei, aniu guai hei akhatna su puni. Kachang kalingnga, Poubaomei rui ata kathiak khat khou kalum, nang rui kathiak akhat khou kalum tu khang salou mak ge. Hiphan, kamei rui meiguaina kathiak akhatna khou kalum khang kahao e. Aniu rui kalummei thiak akhatna khou kalum puni Kamei rui tiloumei thiak nga khou tei kalum khuanne thei.

LATTHAN

1. Kummeijaeng rui cho kalummei thiak bai-bai na nai bam geimei hei?
2. Baibal khou phuamling aju pa tou bo?
3. Phuamling hei thou tuang cho?
4. Phuamling thiak hei tabui tun phang bo?
5. Kalummei thiak hei kum ni na?
6. Thouta kalum khang cho?
7. Kalummei tingmik ti o.
8. Thou rui Poubaomei ta kalum khang cho sa o.
9. Tabuikumma aniu rui kalum khang cho?
10. Kalummei tuang kalang pangu hipat ro.
11. Kumpuijaeng rui aniu kalummei gan khou baan rui kasiammei khuan aniu rui sinsu mak tuang cho?
12. Meiguaina tumei taektu hei tabui cho?

13. Adikamma kha aniu rui katupma tipat khang cho?
14. Kalummei gan khou choirs khatni lusuanmei kalang kadai sumei naimei hei kumma laan tuang cho?
15. Kummei jaeng rui aniu khang nthukmei tingmik Christmas ram e thei Easter kummei aniu khang nai mak tuang cho?
16. Adikamma kha Poubaomei taektu hei katupma tukhang tha?
17. Maansei tuang riakdin khatni latdan hei tabui cho?
18. Poubaomei tuang maansei ta Latding Raan hei rui sin bam di hai?
19. Kumma Latding Than tihei sinsu khang tha?
20. Rachap khou chuncham ngam puni dai? Kumma ngam khang?

PARA 8

BAIBAL KATHAIMEI

Latding Than khou kalummei kalang pangu pang khou hei baibal kathai-meimei hei ni kajao e. Aniuta kathai khang latdan timei na ram maknga khristian surei mei nun rui baibal kathai kanne kalum khang guang kaduaimeimei gan khou tei.

Baibal kathaimiei hei su ni ni khou sunu de gaankhat rui, tiki ntao aniu rui sabammei hei thu rakai kuna nitdak tuang reimeimei tingmik nung kalummei gan khou kalummei tuang kalang akhat suna taan patnimeimei lam ta e. Kumma taan-meimei gan khou tei Poubaomei rui kalat paan rui aniu ta kachu bam tuang nge.

Mi kalummei tuang kalang akhat hei nthanmei latrik hei pah lana kathai mei gan ram e thei gaankhat ruina dinmei nking ncham khang the. Asts 20:7 khou aniu rui hou e Paul ruina Troas khou chana nun le tuna katin lana dinlou kanmei kaniu ruina kalum khang kaduai mei gan khou tei. Acts 17:10-12 khou aniu rui kumma pa tou e, “Kumma jing keipui le chana puna guai tei rui kaluak kalat Paul le Silas ta jingbang thang Beria kaidai thang ndiulou kan the. Kanei mi bam khou tei guangnga sinagog ku the. Mi khou tei bammei Jihudimeimei nun tei Thessalonikamei nun suang chakui khuanne. Kalam thu kaniu Paul lat lung gutna nking e khatni Paul lat guai tei kachang ni tumei Nthanmei Latrik tingmik pum minna kathai e. Kumma kaniu mei mpeina lum khuanne, khatni champoulou numei Grikmei ntumei mpeina lum khuanne.” Khrista rui din e, “Nthanmei Latrik khou tei rui ringsuangmei laatou puni tuna nangniu hei tei kathai e. Mi Nthanmei Latrik tei thu alam khou sa bam tuang de” (John 5:39).

Paul rui chabuan Timothy ta katiuna sa e, “Taan suaina jakmei ariupui mei tei kum maknga; Raguang mikjao khou pianlou nupui taanvtaanhmei siamruaimeimei su khang, Raguang tuang nchummei lat tei nchumma sinsu-

na ngampui kasang taan o” (2 Timothy 2:15). Khrista rui sa e, ‘Rachap tat khang ndaep-tari bammei nun tei jaenggai mei e; kaniu ta tipianlou puni”. (Matthew 5:6). Kumma ni sadat dihe, “Jisu rui mundaona sa the, ‘Ntian na rui mei ring makge, tiki Raguang muang khou rui patmei lat guai tei rui ring khang de tuna hilouna nai e” (Matthew 4:4).

Aniu ruina nchumma na kathaime i na ram mak nga nchummei tei kathai mei hei kage e. Dinmei khatni rachap pari rahmei gan khou ni mi tei kumma nchummei khou kathai ni tuang nge. Apostle Paul rui kumma sa e, “Kumma lummei hei chuhmei khou rui guang tuang nge, chuhmei hei Khrista ta din ndaomei khou rui guang tuang nge” (Romans 10:17). Mi kaba tho aniu rui chuhmei tei laanmei khou thei aniu laan puni the, kadai suna aniu rui chummi chaeng jao lou makmei gan khou. Tiki aniu rui chummei tei chulou e thei aniu rui lummei tei ni nchummei su puni the.

Raguang rui aniu khou ase i hei sa the Kanah Npou Jisu Khrista paan rui. (Hebrews 1:1,2). Lun guanlimei ching khou tei, Raguang rui kumma sa e, Kanah Jisu lam khou, “Mihei alung kunmei, ai rui njianmei anah Mpou e. Nangniu kalat chu o” (Matthew 17:5). Khrista rui Raguang lat tei sa kan ne, “Jisu rui mundaona sa the, ‘Ata njianpui mei tei alat piu puni. Apu rui kata njian puni, kumma apu le ai kakhou guang lung bam puni. Ata njian makpui mei tei alat piu mak ge. Ai rui sa bammei lat hei akhou rui patmei lat ramme, ata ndiu guangmei apu la de.” (John 14:23,24). Kumdat lana mi lat hei hikei lou the: “Mi buk khou hilou makmei, Jisu rui kajiap nun hu khou taanlou kanmei su nchinmei taan mpeina nai he. Tiki Jisu hei Khrista, Raguang Na Mpou e tumei nangniu lum khang, kumma lummei paan rui nagnniu kajan khou ringmei la khang mi guai hei hilou tuang nge” (John 20:30,31). Mbuna, Nthanmei latrik kapum hei Raguang khou rui guang tuang e, kumma mi hei nchamlou khang, luhlou khang, su ntunlou khang, khatni rachap tat khang nchamlou khang gaeng e. Mikumma, mi hei rui Raguang siamruaimeita kathou taan khang biupuime i khatni gaime i taanv kathui taanc ngampuime i tisulou e, ningtha sume i nthuime i ning tisuloume i Raguang lat pui jaeng khou rui. (2 Timothy 3:16,17; James 1:25).

Kumma tat keime i guai hei nchummei jaeng rui, aniu rui Poubaomei tingmik nung katin lana Raguang lat hei kathai nime i lam hei npeina nai the:

1. Aniu rui taan nime i lam tho mi hei Raguang latdan puijaeng rui e. (Hebrews 13:7; 1 Peter 1:23; Ephesians 6:17). Adikammakha chrin kan tucho Poubaomei rui aniu ta jing khou gan lou du maknga kachun tei aniu khou ndao lou mei hei.

2. Aniu rui Raguang chun hei nthuina thai ni tuang nge. (Acts 13:7).

Kumpuijaeng rui aniu khou nai the kathai lana thai khang hei. Poubaomei rui aniu khou ningting tilou the Kachun kathai lana thai khang.

3. Aniu ta guat mak khang rui kathai ni khang nge.(Ephesians 4:14; Ephesians 5:6; James 1:22). Khristian janphuak khou rui ram geisi dinlou bam gei the. Chummei ni chum makmei ni tumei kumma thai khang? Aniu rui Raguang latle tuna kihdana jao nina the. John rui kumma katiuna salou e, bumaeng tei Raguang khou ruini, ram e thei, dinmeipu hei Raguang lat di ni tumei hei. (1 John 4:1). Gaankhat ta guat thuai khang maek ge kamei rui Raguang lat le tuna kida na jao taan bam puigan khou.

4. Aniu rui Raguang lat hei kathai ni nituang nge aniu rui thaime na rammaknga gaankhat khou din pat dat ngam nu khang rui. Paul rui sa e, “Nang rana nang ta ni, nang rui nchamlou bammei latdin ta ni jao chui o. Nang mi kumma su bam e thei, nang rui nang ta ni, nang lat nking bammei nun ta ni kanlou puni.” (1 Timothy 4:16). Khristian sureime ni nun lam khou hikeiloumei record rui sa e, “Pak phak tat kanmei nun tei tat lik sik siknga gaicham tei dinlou the” (Acts 8:4).

Aniu rui kathai bammei hei tatgut keime khou, ai ruina 2 Timothy 2:15 thang tei han gut datna jao lou ni e, khui tei Paul rui samei tei kiu tho aniu rui kathai ni na e Raguang lat tei nchumma sinsu chui khang. Ntao aniu rui kathai gutmei khou hei aniu rui mi tei kumma su khang the. Hikiu tho, aniu rui phang puni Baibal hei Latding Guang khatni Latding Than. Aniu ruina ni thai puni Latding Guang khou hei Pu Juk khatni Moses Latdan, hinei ruina aniu ta bang dat mak khe, khatni Latding Than hei Khrista tuang latdan nai e tumei. Lat thiak khat khou sa pu khou, Latding Guang ruina Khrista thei makmei hu thangmei nun ta sa bam tuang nge tumei. Kumpuijaeng ruina khat rui kaguangmei/karaanmei khatni khat rui kathanmei. Tiki tho, aniu rui kummei tun tei? Kaguakmei tuang maeknga thai e kiu tho aniu ruina khros biak thang bam puijaeng rui Khrista Latdan bang khou bam the tumei Kathanmei Latding theilaina thai the. (Hebrews 9:16,17; Hebrews 10:9).

Kum e thei lathan hei nai the aniu ruina Latding Raan/ Guang hei Raguang lat re na lumme thei. Latdao thu nguai tu rap khang nga di the. Kumme cho tiki, latdan tei rui aniuta khatni mei gaankhat ta bang dat mak khe. Kum e thei, aniu rui tabui khang Latding Guang tei kathai bam tuang?

Kalam peina nai e:

1. Damloumei khatni kahou thao kanmei tei thai khang rui.
2. Maanseina tuang ruanri thai khang khatni Raguang ruina maansei ta kumma su kan tucho tumei thai khang.
3. Kalam tho Paul ruina samei mi tei rui aniu ta su nchinloumei tuang

nge. (1 Corinthians 10:6). Kaling si tho su nchinloumei peina nai gei de.

4. Kathiak kariak guai tei aniu khang reikhou tei kumma nchum bam khuan sinni na, kaniu guai tei kariak latdan le tuna kaluan maek ge.

5. Aniu hei gaihianmei latding bang khou bam the khatni gaihianmei rigunmei naime khou bam the.

Ntao aniu ruina Raguang lat hei kathai gaidiang khang, khatni kaba nai nbu khang, khatni lat tei kalang nthuina khaklang pat chui khang rui, kabang khou hei sunime kathiak asaek tilou e:

1. Latbam tei pa luan geisina pa o.
2. Latluan tei ni pa chui o.
3. Thou rui sabam tuang?
4. Thou ta sabam tuang?
5. Kummei gan khou sa kan tuang?
6. Latgiam suna satuang ni, kaling ndao na satuang ni?
7. Mi tei latdan bo?
8. Mi tei aniu tuang ringbam khang bo?

Mi baansin nun ruina nkhalou bam nu e: Translation bai baime, Baibal dictionary, baibal concordance, commentaries. Ki kaguaina pang khou ruina Kalumma baibal hei pa/kathai o. Meigeisi ruina baibal lat thai e, tiki kabam kalam tei thu thai tang makmei peina nai e.

Aniu ruina Poubaomei rui samei khou tei taan khuan ne thei, khatni nei-dak tuang reime tingmik pum katin lana baibal hei kathai bam me thei, baibal tuang ningting tei naina aniu guaina khristian panti hei daithao puni. Mi hei meiguaina ruina taan khuan ne thei, phuamling hei kapumtan nbu ku puni, khatni rachap heijumei guai ni tuna Raguang latkaeng ruina gulou tuang ge tumei hei thai lana mi tei ruina gulouna meiguaina ta bang katinlou puni.

LATTHAN

1. Thou rui baibal kathaime khou kajao nu bo?
2. Kumma aniu ruina Raguang lat chu tou nu bo?
3. Kummei jaeng ruina Bereans mei nun ruina Thessalonica mei nun khang suang chingkhiumei kheiliak phung hian kan tucho?
4. Khrista ruina John 5:39 khou kumma sakan bo?
5. 2 Timothy 2:15 hei hipat ro.
6. Khrista ruina samei thou ruina saangaime khatni tipadikmei supuni tuna sa bo?
7. Maanseina hei ntian na rui ring ngam dai?
8. Kumma lummei hei guang tuang cho?

9. Aniu rui nkhuamei tei chu pui gan khou kum puni cho?
10. Kummei thiak khou rui Raguang rui aniu khou sa lou bo?
11. Kum khang ruina Jisu rui dinloumei hei hi keilou tu cho?
12. 2 Timothy 3:16, 17 khatni James 1:25 hei pahlou o.
13. Aniu rui katin lana kathai nimei lam tei hi kei lou o.
14. Nchumma latkaeng tei kalang subak chui o tumei lat kabah hei tabui cho?
15. Baibal khou latdan kathummei tei hi o.
16. Kummei latdan bang khou aniu rui ntao bam tha?
17. Karaanmei latding hei Raguang latkaeng nai dai?
18. Kummei jaeng rui aniu ruina Karaanmei Latdiang hei pa khang cho?
19. Baibal pahmei/kathai nimei thiak asaek tei sa o.
20. Baibal kathaimei tuang baansin asaek kiu kum kummei tei cho?
21. Baibal ningting naime rui aniu ta kumma nkha lou puni bo?

PARA 9

HUAINEIMEI

Latding Than tuang kalummei khou hei huaineime i hei ni kalang akhat the. Khristian sureime i nun ruina kalum khang katinme i gan khou huaineime i hei ni kalang akhat suna taan pat kan ne. Phuamling hei lingthao lou rap khou rui thaona, hikeiloume i latrik rui kumma sa e, “Kaniu tei latdiu-tatme i nun rui nchamloume i khou, phuam kariume i khou, tu jang kariume i kahtni huaineime i khou lung gutna bam kianne.” (Acts 2:42). Thailou kho “huaineime i khou” tume i latkaeng tei kalumme i lung khou tei kalang akhat suna hiloume i tei.

Huaineime i tume i kabah hei, sa nkhaloume i, chaguat sume i, tiguloume i, ram e thei, echam chamme i khou Poubaome i ta kachume i tuang nge. Mihei kalumme i tuang kalang akhatna ram maknga, aniu panti lung khou tingmik-pum, kage naime i pum huaine i khang nge. Paul rui hi e, “Kumlana, huaine i o, nkhalou khang nei o. Kagan kathui Bumaeng paan rui huaine i o. Ntak nrak bam o; khaengthai o; Raguang me i nun khang huaine ilou tan tan bam o.” (Ephesians 6:18). Kame i rui sadat di he, “Taek maknga huaine i bam o.” (1 Thessalonians 5:17). Mi kabah thu gaankhat ruina huaineime i lungning tei taek maknga nai bam o tume i tuang nge.

Aniu ruina nthukme i lam nun kaphian bamme i lung khou, kadai sume i points nun hipat jao kho:

1. Huaineime i hei khristianme i nun tuang ram e thei Raguang na nun khang nge.

Mi hei khristian ram makmei nun ruina huainei nu me tumei tuang ramme, huai khang ramme tumei tuang ni ramme, tiki tho nthanmei latrik ruina nthanthiak nga salou e huaineime i hei thu khristianmei nun tuang suaihiam khatni kadouchamei e tuna. Aniu rui pa tou e, “Raguang thu paepmei nun lat chulou mak ge tumei aniu thai e. Kata chakhuang sumei khatni kamei rui ningmei taanhmei nun lat rui chulou tuang de” (John 9:31). Ntao tho aniu rui Poubaomei rui chulou nime i ram kalum thiak- kamei tei Raguang ta kalummei suni na re khatni Poubaomei rui kahaomei khou taanmei su ni na e. Hi kiu thou tha? Khristianmei the. Hina ramma, paepmei rui tabui khang huainei ngam khang? Kamei rui kapaep kuaklou khang huainei ngam mak ge kalam thu, Khrista rui sa e gaankhat ruina lumlouna baptaise sunina re gulou khang tuna. (Mark 16:16). Kamei rui lummei nai khang huainei nu mak ge kalam kiu tho nthanmei latrik hei hilou the lummei naipat khang hei. (John 20:30,31; Romans 10:17). Khatni kamei ruina ram akhat khang paepmei sumei jaeng rui huainei nu mak ge.

Aniu ruina Latding Than tuang hei jao gutmei gan khou, nthanmei latrik nun rui huaineime i lam khou samei guai hei khristianmei nun guai rui huaineime i lam khou de. Khristianmei thu latpiumei jaeng ruina Raguang na nun de (Galatians 3:26,27), khatni kumpui jaeng ruina Raguang ta apu tuna kao nu tuang nge (Romans 8:15). Maansei kathuina-khristianmei ni khristian ram makmeini-tuna huaineime i pan rui Raguang daeng guang nu khuanne thei khristian sumei ram gai paepmei khou rui hian tuang nai bo na? Kum the na nang rui thai the khristian na ruina huaineime i ramgai naime i tei khatni bumaeng tuang suaihiam hei khristianmei na khou nai e tumei hei. (Ephesians 1:3).

Aseidou hei paepmei ruina kapaep kuaklou khang kalum lana khristian suna bammei peina ariu e. Kumme cho tiki tho, mihei baibal rui samei ramme tiki mihei maansei mei riakdin khuanne.

2. Jisu Khrista paan rui aniu tuang rasuai hei Raguang khou suni tuang nge.

Raguang hei Pu e khatni kamei ruina suaihiam guai tei tiloumeipu su the. Aniu ruina nkhalou khang Kata nakha kalum khang khatni kamei na ruina tiloumei jaeng rui kata na aniu rui thuanna bam khang nge kamei rui tiloumei suaihiam kaguai na khang hei. Tiki tho, aniu ruina kata njutphutna alam nu makge kalam kiu thu aniu le kakak khou hei aniu paep rui kham mei nai the. Kabiak akhat khou sadat pu khou, mei gaankhat ruina aniu ta guatsulou khang phu khang thu ram makge. Mi phaen tei Jisu ruina aniu tuang guatpou sulou the, aniu khin suna kamei rui salou bam the, khatni kamei ruina aniuta

jaiguangloumei suna nai the jaojian tuang guang bampaeng khou aniu rui guang nu khang. Raguang latkaeng chucham lou kho, “Thou puni Jisu hei Khrista e tuna lumpuimeimei tei Raguang na the. Puta njianpui mei tei kana ta ni njian e. Aniu Raguang na nun ta njian e tumei aniu thaimeimei kiu thu: Raguang ta njianmeimei khatni kalatdan guai piumei khou nai the.” (1 John 5:1,2). Kumdat lana, “Kalamthu Raguang akhat nai e, khatni maansei ta Raguang khou jai kariu lou datmeipu gaan khat nai e. Kamei kiu maansei Khrista Jisu e.” (1 Timothy 2:5). Kumpuijaeng ruina aniu ruina Khrista jan khou ram e thei katuang ngam lung khou huainei khang the (Matthew 28:18).

3. Aniu rui nchummei khou akhatni bumaeng khou kalum khang nge.

Katheimeimei para khou tei aniu rui hou lou kan the Raguang ta kalum nimeimei hei bumaeng khou khatni nchummei khou kalum nina re tumei tei. (John 4:24). Huaineimeimei hei kalummei khou kalang akhat puijaeng ruina khatni mihei aniu panti luan akhat supui jaeng ruina, aniu hei Raguang ta kalummei hei nchummei khou khatni Bumaeng khou kalum khang the. Korinmei nun khou Paul rui hi e, “Ai mei thai makmei lat rui huainei e thei, abumaeng rui thu huainei the, tiki hei tei alungning khang thu kabah maek khe. Kum e thei, ai tabui kumma su nina cho? Ai abumaeng rui huainei puni, kumma alungning ni kajaona huainei puni: abumaeng rui ai lu suan puni, kumma alungning ni kajaona suan puni.” (1 Corinthians 14:14,15). Mi kiu thu, aniu huaineimeimei hei giantana huainei khang nge, khatni aniu lungning ni aniu rui neimeimei khou bam khang nge, khatni aniu lungning hei niammei khatni nkhiu keina khatni lungning nthanna huainei khang nge. Nbuna, aniu rasuai hei Nthanmei latrik le tuna ncham khang nge. Hikiu thu aniu rui huaineimeimei tei Kalat le tuna kadat kadaeng khang ramme tumei tuang nge. Khrista rui kaluan akhat khou kumma sa e, Kajiab nun guai ruina nbaahmei ram huainei nei puigan khou, “Mundaona Jisu rui sa the, ‘Nangnei tabui tuang nei bam tu cho tumei nangnei thai mak ge. Ai rui jang nimeimei buang hei nangnei jang diu na cho?’ ‘Anei jang diu e.’ tuna kanei rui kakhou dao the.” (Matthew 20:22). Kamei rui sadat di he, “Jisu rui kakhou sa the, ‘Nang Raguang Poubaomei ta nchan lak nina e,’ tuna ni hilouna nai e” (Matthew 4:7).

Hi rui kalam akhat the aniu ruina Poubaomei Rasuai hei suai nu makmei kiu (Matthew 6:9-13). Mi tei Poubaomei lat le tuna ncham lak nimeimei jaeng rui e kiu tho Guangdi hei guang tang lou the, kumpui jaeng rui guang lou dat khang kalum/huainei dat khang ram the (Hebrews 12:28).

4. Aniu huainei nimeimei lam guai tei nthanmei latrik khou nai ngam the.

Aniu rui thuankumei rasuai suai khang the. “Nangniu ram lam akhatna khang sinni lung katuak bam riu, tiki nangniu huaineimeimei kathui, nangniu

khang kage naimei guai tei Raguang khou poulou o, thuankuna nei o.” (Philippians 4:6).

Kage naimei gan khou aniu rui huainei khang nge. “Kumma Pitar ta kang-kai khou lou bam khou tei, phuamling rui kakhang Raguang khou lung gutna huainei bam khuan e” (Acts 12:5).

Aniu rui kandimei meipi-meiga guai khang huainei khang nge (Romans 13).

Aniu rui khat khat khang huainei lou khang nge. “Nangniu ta su numei khou rui tigailou khang, nangniu tuang khuai khat khat khou kalauna khat khat khang huainei kari o. Rachaptatmeipu tuang raduai rui taandai taan ngam e.” (James 5:16).

Aniu rui sunu naonian mei nun khang huainei lou khang nge. “Nangniu pang khou thoukummei nnao bammei nai tu cho? Poubaomei jan khou kakhou thao teilouna kakhang huaineilou khang phuamling tuang gaanthai guai ta kao kan diu. Lumna huaineimei tei rui kata tigailou puni; kumma Poubao-me rui kapum tigailou dat puni khatni kamei nkhuainei taanlou tuang nai e thei kuaklou puni.” (James 5:14,15).

Aniu rui kalum lou nimei nun hei kum ma npeina nphang the Nthanmei Latrik khou dinloumei slatbam aju. Mipang khou hei kajao lou mei pang kiu,phuamling khang, kaikhunmei nun khang, nmaanmei nun khang, khatni bai baimei nun khang.

5. Nthanmei Latrik ruina Huaineimei khou suriak thai bam khang sa lou e.

Khrista rui sa e, “Nangniu huainei pui gan khou, gailunsumeimei nun tei kum riu; kalam thu kaniu tei mei nun rui hou khang sinagog khou khatni mei geimei chaengdai kun kun khou dingnga huainei nii e. Ai rui nangniu khou kaling siaknga sa tuang e: kaniu tei kaniu tuang suan laa tang the. Tiki nang huaineipui gan khou, nang kai lung khou gutna kaikham nbanglouna, mik rui hou makmei nang Pu khou huainei o. Kum pukhou, mei thai maknga taanmei ta houmei nang Pu rui tilou puni. ‘Kumma nangniu huainei khou, Jentilemei nun rui kabah maekmei lat kaluai kaluaina suai bammei tei kumma su riu; Kalam tho nangniu nei mak khou rui nangniu khang kage naimei tei nangniu Pu rui thai rei bam tuang de.” (Matthew 6:5-8). Kumdat lana Kamei rui kakhimma salou e, “Kalamthu mei nun rui nangniu khou nkhuailoumei tei nangniu rui kuaklou e thei, tingkao thang bammei nangniu Pu rui ni nangniu khuai kuaklou puni. Tiki nangniu rui mei nun khuai kuaklou mak ge thei, nangniu Pu rui ni nangniu khuai kuaklou lak ge.” (Matthew 6:14,15).

Kumma luaisin louni khou, huaineimei hei daisimei latbam me aniu rui kalummei gan khou ram e thei aniu panti chaengluan khou. Tiki, aniu

khristianmei khang tho hi bam kanei mei khou tei Raguang ta kao khang kadouchahmei nai the. Mi na tei ramma, Poubaomei ruina kumma su pu khang ning nge. Kalummei lam khou suna samei gan khou, khristianmei ruina kakai khou na bam lana (Rakai ku tat mak lana) Raguang ta kalum lana Poubaomei tuang taektu tu lana khatni tipatmei taan hei taan bam ne tumei thu nuh mak khe. Kalum khang Rakai khou katin kanmei nun tei kakai khou ni kalum muai kanni de. Tiki, thou kummei rakai kuna kalum makmei nun tei kakai khou ni kalum mak muai puni de, kaniu ruina kalum bam tuang nai khuan sinni na kathai nai ni turamme kaniu ruina rakai kuna Poubaomei ta lumma kalummei kaba tei thaina piu mak pui saan.

Lumma kalummo, nei o, khatni nang rui latou puni. Huaineimei hei kapum tan nai hak ge.

LATTHAN

1. Huaineimei tumei hei tabui cho sa o.
2. Mi tei rui aniu panti khou kummei thiak khou sulou khang?
3. Adi katupma aniu rui huainei khang?
4. Huaineimei hei thou khang nga dai?
5. John 9:31 hei pa lana kalam dinno.
6. Kum tuang khang paepmei rui huainei nu bo?
7. Thou tei khristian cho?
8. Thou rui Raguangma khou huaineina guang nu bo?
9. Paepmei rui huaineimei pan rui guloumei latou ngam dai?
10. Thou paan rui Raguang ta kalum khang cho?
11. Jisu hei aniu khang tabui suna guang lou tha?
12. Nchummei khou khatni bumaeng khou kalummei tumei hei din nthan no.
13. Aniu ruina aniu rasuai paan rui Poubaomeita nthiam ngam dai?
14. Poubaomei Rasuai kiu tabui cho?
15. Kummei jaeng rui aniu rui mihei piunu mak tuang cho?
16. Aniu rui huainei lounimei bam nun asaek sa o.
17. Thou thou kummei khang cho aniu rui kalum lounimei kiu?
18. Poubaomei rui huaineimei lam khou kakhimloumei tei sa o.
19. Khristianmei akhat rui kakai khou bam lana kalum nu dai rakai kuna kalum mak sinni?
20. Tabui kumma aniu rui kalum/huainei khang cho?

PARA 10

LUSUANMEI

Khristian rachap hei lusuanmei rachap de. Lusuanmei hei Latding Than tuang kalummei duan akhat re. Duina kathai mei khou hei aniu ruina lusuanmei hei kalummei tuang duan nthukmei akhat su mei jaeng rui gut dumaina kathai khang lani pui tuang e.

Reiliangmei khou, aniu ruina lusuanmei lam khou samei baibal bam nun tei jao rei kho:

1. “Mitang kaniu lu akhat suanlou lana olive luangbut thang tat kan the.” (Matthew 26:30).

2. “Jipchung jaeng khou Paul le Silas tei Raguang khou huaineina lu suan bam khuan e, kumma baimei kangmei guai tei kanei lu tei nking bam khuanne.” (Acts 16:25).

3. “Mi hei Gentailmei guai rui ni Raguang ta kajaojian khang rui thuan ku khang e. Mi kumma hilou na nai e ‘Kumma ai nang ta Gentailmei pang khou thuan puni; ai nang ta thuanna suan puni.’” (Romans 15:9).

4. “Kumme thei, ai tabui kumma su nina cho? Ai abumaeng rui huainei puni, kumma alungning ni kajaona huainei puni; abumaeng rui ai lu suan puni, kumma alungning ni kajaona suan puni.” (1 Corinthians 14:15).

5. “Nangniu khat khat khou kalumlu, himthuanlu khatni bumaeng lu lat tei sa suan kari o; khatni nangniu lungsing rui thuanna kalumlu khatni himthuanlu Poubaomei khou suanlou o” (Ephesians 5:19).

6. “Khrista tuang lat nangniu lung khou ching khiuna nai nina e. Ningting padiknga khat khat ta ncham nchei kari o. Kalumlu, himthuanlu khatni nthanmeilu suan o. Nangniu lung khou thuankuna Raguang khou suan o.” (Colossians 3:16).

7. “Hei jaeng rui, ‘Ai rui nang jan achana nun khou kao ndao puni; kaniu guang kariupui bam khou, ai nang ta thuan puni,’ tuna kamei rui Raguang khou sa e” (Hebrews 2:12).

8. “Nangniu pang khou thoukummei rianra bammei nai tu cho? Kamei huainei kan diu. Thou kummei neihla bammei nai tu cho? Kamei Raguang ta thuanna suan kan diu” (James 5:13).

9. “Kaniu tei mi kumma luthan suan bamme: ‘Nang hei mi latrikji hei laana, napbinloumei seal guai tei ri pat khang jei rui kaikhuang kathui ,jat kathui, lat kathui khatni guangdi kathui khou rui; Raguang mei khang thuakpat lou the” (Revelation 2:9).

10. “Mei gaan 1,44,000 tei khouring padei khatni gaan thai nun ka daeng khou bammei guang bampaeng hu khou tei dingna luthan suan bam

e. Kaniu na hamma mi lu tei mei thai mak ge. Kaniu hei mbaan kapum khou rui guangmei thuakloumei nun e” (Revelation 14:3).

11. “Raguang bang Mousi khatni Laojiu Na tuang lu mi kumma suan bam e” (Revelation 15:3).

Latding Than khou karu khou tilou mei baibal bamma de lu suanmei lam khou saloumei. Khou rui nthanna thai the Poubao mei rui kahaomei lu suanmei luan khou hei. Hi khou rui hianmei ram e thei ntah mei rui thu Poubao-me i lat le tuna ncham makmei su the.

Khristian denominations gei thang ruina lusuanmei hei music kajao khang su the khatni baan rui kasiammei musical instrument sinsu na suan the. Mei-guai ruina kalummei mung khou hei lu suanmei hei kajao e tumei thu nuh ngam the, tiki , kalummei gan khou instrument piuna lusuan ne tumei thu meiguaina rui nuh mak ge, Latding Than tuang kalummei lung khou tat na raning bam mei guai ruina. Ki, baibal rui thu kumma din bo? Baibal rui lu suanmeina tuna din bu ni rammethai mechanical instrument piuna Raguang ta thuanna lu suan khang din bo kalummei gan khou? Mechanical music ka-jao maknga kalummei lu suanna kalum nu dai? Mechaical instrument kajao na kalum nuh dai? Kajao ni nuh, kajao makni nuh tudai? Jao kho aniu guai.

Reiliangmei khou aniu rui hou puni music hei kalang kanei patna maan-seina rui sinsu bam me tumei: muang khou rui patmei music, baan rui ka-siammei baansin/mechanical music. Muang khou rui kakhuan patna lusuanmei hei maansei rui muang khuan khou rui suanmei tuna sa e. Mi hei mei gaankhat muang khou rui patmei khuan the. Mitei ringmei khou rui e. Mitei Raguang baansiam kahak khou rui pat kanmei tuang nge. Nugailiangmei khuan pat mei hei maanseina muang/ruak khou rui pat kanmei tei the. Baansiam khou rui patmei khuan ruina thu mi khou tei rui kadat kadaeng the. Baansiam khou rui patmei tei thu maanseina rui kasiammei tuang de.

Kumpuijaeng rui mitei thu ringmei maek ge, bumaeng ni maek ge, khatni lungning maek ge. Kakhuan pat kanmei tei thu maansei na ruina tipat pui tuang de. Raguang ruina thu mitei kasiam loumei tuang ramme, tiki maansei rui kasiam patmei tuang de. Mitei kaphaan nsinloumei puat khat de. Ntao thu minei khou hei Raguang rui chun puni bo? Hebrews himeipu rui sa e, “Kum thena, aniu Jisu paan rui Raguang ta thuanmei hei aniu ramkhaeng suna kat taan tan bam di kho- aniu muang rui kajan sa ndaona thuan bam di kho.” (Hebrews 13:15).

Kajan tatmei rachap kapi nun tingkum geisi na baan rui kasiammei khuan rui Raguang ta thuan khang nuh ni mak kan khuanne, ki muang khou rui patmei khuan rui thuan kan khuanne baibal rui samei kumma. Kaniu rui

samei nun tei jao jao kho:

1. John Wesley: “Aniu tuang chapel/kalummei bam khou baan rui kasiammei baansin/instruments ta thing thuai mak ge, mitei rui kakhuan patmak saan khatni hou mak saan”. Clark’s Commentary, Vol.IV, p.686.

2. John Calvin: Musical instrument sin lana Raguang ta thuan bammei ruina nteina/burnt offering khaeng bammei le,thaomai danthaomei, kariak latdan khou han guang datmei le tuna khatna thuai dat tuang mak khe. Kum puijaeng rui Baptists mei nun ruina thai maknga Jehudimei thiak tei lai nsu bam tuang nge, mina ramma bai baimei thiak aju ni tuna”. John Calvin Commentary, Thirty third psalm.

3. Martin Luther: Kamei rui mi ta tei ‘Baal tuang nanu e’ tuna sa kan e. Mc Clintock and Strong’s Encyclopedia, Music, Vol. VI p.762.

4. Adam Clarke: “Music hei science e, ai kahao e khatni ning karu de; tiki, Raguang kai khou tho karaeng nge khatni chani e. Mihei rui music ta tikhuai e; kumma ai ruina nuhmakmei hei tilou e kalummei gan khou suphuam bammei tihei, Khristianmei tipatmeipu ta kalummei gan khou”. Clarke’s Commentary, Vol. IV, p.686.

Baibal scholars aju ruina ni kalummei gan khou baan rui kasiammei puat rui sinsu lana Raguang ta kalum bammei tihei numak gei kanne. Tiki, mihei tabui tun rui kahou kan to? Mihei Catholic mei phuamling khou rui kahou kanne khatni catholicmei phuamling khou rui pat kanmei guai tei ni tuna kumma catholicmei nun ta lailuai muaina lai sin muai kan the.

Denomination mei nun ruina mitei nchum de tuna kalam tei kabang khou mei nun hei sinsu na salou e:

1. Kaniu rui sa e, David rui sinsu de tuna. Mi tei chum nu de ki, David tho latding akhat bang khou lung nge khatni aniu rui baimei latding bang khou lung nge. David rui taan kanmei guai tei aniu rui taan nu mak ge. Kamei rui taan kanmei guai tei taan ne tu e thei tingkumpum Jerusalem thang khaengpuat phung lana kalum khang tat pui ta the. Ningtoulou kho David rui taan kanmei luan khou taan kaluai nimei nun tei baan rui kasiammei instrument sinmei lam khatni baimei taleina kha de ki kamei rui taan kanmei guai tei thu taan ni mak ge. Tiki, palou o John 1:17; 2 Corinthians 3; Hebrews 10:9.

2. Kaniu rui sa e baan rui kasiammei instrument nun tei sin riu tuna sa mak ge tuna. Kummecho tiki, kalummei gan khou ram kajat mpeina sinsu o tuna sa mak ge. Mi tei rui sa e tabui sin khang khatni lu suan khang. (Ephesians 5:19). Mi tei rui bai baimei guai ta lagan lou the.

3. Kaniu rui sa e mi tei rui khuai thuai tuang maek ge tuna. Baan rui

kasiammei musical instrument hei khumngai gan khou, nousuan khou ram e thei bai baimei kamung khou thu sinsu nu de, tiki kalummei thu bai de. Poubaomei rui salou makmei kalummei khou sinsu mei thu laan de Poubaomei rui salou makmei khou haplou bammei tho (Revelation 22:18,19).

4. Kaniu rui sa e mi tei rui kalummei khou nkhalou e tuna. Kumme ki Poubaomei rui salou mak tuang? Ki ai rui salou ni e mi tei rui kalummei khou nkhalou tuang ram me, ki mi tei rui kalummei tuang luan akhat tisu lou the. Mi hei rui nthanmei latrik le tuna ncham mak khe.

5. Kaniu rui sa e tingkao thang ni music nai de tuna. Nthanmei latrik rui tiangkao thang baan rui kasiammei music nai e tuna sa mak ge. Sa tuang nai bam puni mitei rui ti nchum ni tuang ramme. Tingkao thang mbaan khou kalummei khou sumakmei aju nai puni.

6. Kaniu rui sa e kaniu rui kahao na de tuna. Gai the, ai rui cake, soft drink khatni bai baimei aju tujang ni e kalummei gan khou, tiki mi guai tei ai rui taan nu de tumei tuang ramme. Aniu rui kahao e tiki mi tei Poubaomei rui kahao puni dai?

Kum pui jaeng khou ruina aniu ruina Poubaomei tingmik khou kalum khang katinmei gan khou aniu rui Raguang ta thuanni mei hei lu suanmei khou na rui thuan khang nge. Mi hei nchummei khou khatni bumaeng khou su khang nge. Kum thena aniu rui lungning nthanna giana na lu suanna thuan khang nge. Aniu rui nthanmei latrik theilaina thuanmei lu suan khang nge aniu muang khou rui patmei khuan rui Poubaomei ta. Mi tei na ram mak nga lu tei nthanmei latrik theilaimei lu suni tuang nge.

Baibal rui phuamling mei rui suan mei khou din ne. Mi kiu tho, aniu rui aniu khuan hei nugai nimei thiak khou sulouna suan khang kalum lu, himthuan lu khatni bumaeng tuang sumei lu guai tei. Mi lu nun paan rui Raguang ta thuan mei tuang nge, khat khatta katiuloumei tuang, nchamlou mei lu, khatni khat khatta tidai loumei tuang nge Poubaomei ta lum chuina lum bam diu khang. Adi kamma kha gai kan tucho aniu lu ta su katuakmei tuang khu-an maek nga tiki, lungning sing thang rui champouna, chujaeng nga khatni lungning khou hei sim sim mei rui padik lana Poubaomei ta thuan mei hei. Tabui rui hei suang kaji hianmei nai di hai? Tabui rui katiu lou hian bu di hai? Mi hei Raguang rui kahao mei e.

LATTHAN

1. Khristian rachap hei tabui cho?
2. Latding Than khoumei verse asaek lusuanmei luan khou samei tei pa lou o.
3. Mi verse nun rui baan rui kasiammei baansin nun rui sinna suan khang sa lou bo?

4. Music kaneipat mei tei sa o.
5. Muang khou rui patmei music tabui cho?
6. Kasiammei music lam hei sa o.
7. Tabui thiak khou Raguang rui kata thuan khang lani to?
8. Mechanical music sinsu na kalummei ta nu makmei rachap kapi nun jan asaek sa o.
9. Tabui tun rui baan rui kasiammei lusuanmei baansin hei sin kahou kan to?
10. Baan rui kasiammei baansin sin nu de tumei lat rui agi kanmei nun asaek tei sa o.
11. Tabuijaeng khou ruina aniu ruina David rui taan kanmei tei kumma taan nu mak tuang cho kalummei gan khou?
12. Baan rui kasiammei baansin rui tabui ta kalummei gan khou lagan tha?
13. Aniu rui kai khou baan rui kasiammei baansin nun hei sinsu nu dai ?
14. Mi hei kalummei khou su khang nu dai ?
15. Revelation 22:18, 19 hei palou o.
16. Tingkao thang baan rui kasiammei music nai puni dai ?
17. Aniu rui kahaomei thei laina sumei ta Poubaomei rui nu puni dai ?
18. Poubaomei rui tabui kummei lu ram suan ta lani bo?
19. Phuamlingmei lusuanmei lam sa o.
20. Lu suanmei lam asaek sa o.

PARA 11

POUBAOMEI TAEKTU

Poubaomei tuang Taektu hei ni kalummei tuang luan nthukmei akhat muai the, Khrista rui thai e maanseina hei amuh taan mei jat re tumei hei. Kum lapui jaeng ruina kamei ruina kata ningtou bam kan khang ruina ram khat gan lou du ni mei jaeng rui tilou dumei tuang nge mi hei. Mi tining toumei taan tihei Poubaomei Taektu tuna kao the.

Gutduh makmei hu khou aniu rui mihei tabui kumma lingthao lou kan tucho tumei jao rei kho. Matthew 26:26-28 tei jaolou kho: “Kaniu tu bam khou Jisu rui ntian dum akhat laana thuankulou the, kumma hei tei bi baknga kajiap nun khou tina sa the, ‘Nangniu laana tu tho; mi hei apum the.’ Mi tang buang akhat laana thuankulou the, kumma hei tei kaniu khou tina sa the, ‘Nangniu mathiuna mi hei jang tho; kalam thu mi hei mei guai khuai kuaklou khang keiloumei ajei the. Mi hei latding tuang jei the.’ Thailou kho mihei adi kamma kha chala si cho tumei. Khrista rui lian pat lou e ntian tei kapum the, kum the na mi tei rui kata ningtou bam khang taan khang the. Kumdatlana, buang- ram e thei drakha dui tei ruina kajei khin sumei tuang

the khatni mi tei ruina kajeita ningtou bam khang jang pui tuang the. Lat biak khat khou sa pu khou, Khrista ruina kamaansei nun ruina amuh na bam kanmeita lani makmei jaeng ruina kapumta khatni kajei ta ningtou bam khang lani mei jaeng rui nsin lou du mei tuang e.

1 Corinthians 11:20-29 khou phaekpat na jao kho, Paul rui kumma hilou e Corinth khou bammei chana nun guai khou: “Nangniu guang kariu khou tu bammei taektu tu tu ramme. Kalam thu nangniu tupui gan khou khat khat ta nkhan maknga, kakhang kakhang tu the, kumma gaansaek thu ndaep bam, gaansaek thu jang mba bam the. Nangniu tu jangpui bam khang nangniu kai maeknga cho? Ramme thei, Raguang tuang phuamling ta thousu maknga lungsimeit nun ta sujak bam tu cho? Mi lam khou hei ai tabui tuang lat sa o tuna cho? Ai nangniu ta sathuan bam kho cho? Ai nangniu ta sathuan khang maek ge! Ai rui nangniu khou dinlou kanmei tei Poubaomei rui saloupui lat re. Mi kiu thu: Poubaomei Jisu, kata tinim nimeit jingbang tei, ntian dum akhat laana, Raguang ta thuankulouna, hei tei bi baknga sa the: ‘Mi hei nangniu khang tipatloumei apum the. Ata ningtou khang mi hei tu o’. Hei tei kumma, jingbang naptu tu tang pukhou, kamei rui buang akhat laana, ‘Mi hei ajei rui suloumei latding than tuang buang e. Nangniu mi hei jangpui kathui ata ningtou khang taan o’ tuna sa the. Mi kiu thu, nangniu mi tian hei tupui kathui khatni mi buang hei jangpui kathui Poubaomei theiloumei ta tei, kamei guang mak saan din ndao bam tuang e. Mi ru khou rui, thou pu ni Poubaomei tuang tian tei tu biu maknga tupui mei khatni katuang buang tei jang biu maknga jangpui mei tei, Poubaomei pum khatni kajei ru khou nkhuaipei mei e. Heijaeng rui, mei kathuina kalam kalam khou kakhan rei lana ntian tei tu kan diu khatni buang tei jang kan diu. Kalam thu kamei rui Poubaomei pum tuang kaba tei thai maknga ntian tei tu pukhou khatni buang tei jang pukhou, kamei hei tei tumei khatni jangmei tei rui karana karu khou latjan phung guang bam tuang nge.” Ntao kahoumei khou Paul ruina Corinth meinun ta nphut na sakan the Poubaomei tuang taektu tu mei lam khou hei. Poubaomei rui tiloumei thiak khou ram mak nga kaniu ruina tujang nba na bam tipui jaeng rui e. Mi thiak hei su khang ram makge. Kamei rui sunimeit thiak tei ncham lou kan the mi tuang kaba tei khatni kumma tujang nina cho tumei tei. Paul rui mihei kamei rui Poubaomei khou rui latou kan pui tuang nge tuna sa na dinlou kan the. Mi kiu thu:

1. Poubaomei rui kata tinim kannimeit jingbang mihei lingthao lou kanmei tuang nge.

2. Kamei ruina ntian hei kaniu khang baklou kanmei Jisu pum tei e tumei dinlou kan e.

3. Kum dat lana kamei ruina buang tei laa dat lana kaniu khou tei Jisu jei ta ningtou khang jang bam khang e tumei dinlou dat muai kan e.

4. Katupma mi taan hei taan pui kathui kamei rui guang dat maksaan kamei theilou kanmei tei su ndao bam tuang nge tumei dinlou kan e.

5. Thou kummei ruina biu makmei khou tujang kanmei kamei tei Jisu pum khatni kajei ta nkhuamei khou tujang lou e tumei dinlou kan e.

6. Tujang nimei kathui ruina kara rana kapum ta chaengjao na tujang khang riaplou e.

7. Biimakmei thiak khou tujanglou kanmei kamei tei karana kabumaeng karu khou latjan phung guang lou e.

Hi guai hei nthukmei points pang the aniu ruina minnna kathai lou nimei.

Aniu rui hugutna kathai gutmei khou thailou nimei pang kiu :

1. Poubaomei ruina dinloumei hei buang akhatna piu khang nge tumak ge. Kaluan luan khou maansei pang rui buang akhatna khou rui jang nina de tuna sana buang akhatna khou rui meiguai jang kanne. Poubaomei rui samei tei buang lam khou tei ramme tiki buang khou naimei lam khou tei satuang nge. Kumma buang akhatna khou rui tujang tuang nge tumei rui khatna hakmei tuang nai thuai mak ge aniu rui mitei Jisu jeita ningtou khang taan pui gan khou. Gaankhatpu ruina buang akhatna piumei phuamling akhat khou kariuloumei gan khou kamei ruina buang khou naimei kaguai tei jang ngam dut lou khuanne. Khou tei meiguai rui mitei thu nu mak ge tuna sa kan the meibaimei phuamling mei guai rui kum ni the na? Kamei rui kaniu khou tei ti ningtou lou kanne, “Nangniu guai khou tei rui jang tho” tuna samei tei. Mi hei rui lianlou e tumei thu heidi chala sime tihei maansei nun ruina maansei nun ta ti kaguak lou nu e. Buang akhatna sinsu makmei hei baibal rui samei khou rui thu baimai nu e, tiki tho, pumluan khang rui khatni bai baime lam naime jaeng rui jangnime buang tei gaankhat khat khang bai baime buang piumei rui gai hian e.

2. Jisu Khrista pum khatni Kajei ta ningtoumei na rammak nge, mi taan hei rui kamei rui guang nga aniu ta ladat nime khou lum bam khang suloumei tuang nge. Mi thiak khou rui tujang tuang ram makge thei tujang bammei tei gaeng mak ge.

3. Poubaomei tuang taektu tumei hei rui gaankhat rui tat kanmei gan khou tei tabui lunlung khou lunglou kan tucho tumei ti kakhan lou datmei gan tisulou khuanne. Kamei ruina Poubaomei rui kahaomei khou lunglou kan de tu e thei kamei tei kumma Poubaomei taektu tei tu khang the. Kumme ki, kamei tei tat kanmei gan khou tei chui makmei lunlung khou tei lunglou kan ding nge tumei thai pat re thei kamei tei reime khou lunglai pat rei lana

mi taektu tei tujang khang nge.

4. Gaankhat ruina karana kalam khou chaengjao chui loumak nga khatni katuang chuimakmei khou tei ruina lunglai maknga tujang puimei tei guloumei latou khang jangmei phaen nkhuamei khou tujang lou the. Nguai mei guaina hei tho paepnaime i jaeng rui biu rapmei thu ram mak ding nge. Kumme cho tiki tho, Poubaomei rui thai e aniu hei nthuime i ram makge tumei kumma aniu rui numei kam tujang chuina tujang khang kamma tujang khang nge. Tiki tho, gaankhat ruina thai na khaan lana kamei rui nkhuailoumei guai tei tiki lunglai mak nga tujang mei kamei tei thu mi taektu hei tujang biu mak ge. Kamei tei karana kata guatpui mei su the khatni mi tei ruina amaanmei tisu lou the. Ki Poubaomei thu thai e kum thena kamei rui kapanti tei su ntun lou dat lana tujang khang nge.

5. Aniu rui Poubaomei taektu hei aniu rana tujang khang rammak ge. Tiki tujang nimei kam tujang nu de. Ki tho tujang nimei pu/pui tei karana kapum lam khou chaeng jao chuina jao kan diu kamei tei biu puimeini biu makmei ni tumei tei. Kum maknga aniu rana tujang kan pukhou, tujang makmei tei rui ning kasi lana aniu khou rui duna tatpat bam nu e khatni kamei tei guang dat mak nga ni bam nu e.

Luaiguangmei khou, aniu rui Acts 20:7 khou pa tou e thaoreime i khristian nun ruina kalum khou neidak tuang reime i tingmik nung tian bi bak pat lana tu khang katin bam kan ne. Kumpuijaeng rui aniu ni kummuaina su khang the. Tiki, kumme i neidak tuang reime i tingmik nung? Neidak tuang reime i tingmik pum tujang khang the. Thou rui nangta, ata suni ni mei neidak tuang reime i tingmik khou Poubaomei taektu tujang khang ngam tilou na cho? Mei gaankhatna rui sinni ti mak ge. Kum the na Raguang rui ganlou dumei thiak khou tei mi kiu thu kamaansei nun rui taan kanmei tei kumma neidak tuang reime i tingmik nung kalum khang katin louna khatni khou tei Poubaomei taektu tei ni tuna kajaona tujang bam kanmei tei kumma taan khang the.

LATTHAN

1. Poubaomei taektu hei thou rui lingthao lou tuang cho?
2. Matthew 26:26-28 hei palou o.
3. Tabuijaeng khou rui ntian hei tu khang?
4. Drakha dui rui tabui tuang khin sulou tuang?
5. Jiab nun tei rui adikam makha katupma tujang kan bo?
6. 1 Corinthians 11:20-29 hei pa o.
7. Corinthmei nun ruina Poubaomei taektu tihei kumme i thiak khou piu bam kan bo?
8. Paul ruina mi lam khou hei kumma salou kan bo?

9. Paul ruina Poubaomei tuang taektu hei tabui thang rui latou kan to?
10. Kummei thiak khou ruina Poubaomei theiloumei tihei ti ndao pat nu bo Poubaomei taektu tujang mei pan rui tumei hei din o.
11. Kaniu ruina biu makmei thiak khou tujang puigan khou kum puni cho?
12. Nthanmei latrik ruina buang akhatna piu khang sa bo?
13. Buang tei ni, buang lung khou naimei tei cho aniu rui nthuk nga jao lou nime?
14. Poubaomei taektu hei kummei thiak khou Khrista rui kaneime suna guang datnime le tuna kariang nai bo?
15. Poubaomei taektu ruina Christian khang gaengmei suaihiammei taan sulou bo?
16. Poubaomei ruina aniu ta nthuithik khang ning bo Poubaomei taektu tu makmei hu khou ?
17. Gaankhat rui thaina paep suna bammei rui Poubaomei taektu hei tujang nu dai?
18. Aniu rui gaankhatta Poubaomei taektu hei tunu mak ge na sa nu dai?
19. Kummei neidak tuang tingmik khou Khristian mei nun rui Poubao-me taektu hei tu khang katin khang cho?
20. Poubaomei rui mei gaankhat khou neidak tuang reime tingmik akhat rei lang pat lana tujang bam khang ngam tilou bo?

PARA 12 **TIPATMEI**

Kariangmei khou aniu ruina Latding Than tuang Kalummei luan nkhammei khou tipatmei lam khou hei hei jao di kho. Baibal rui ram lam akhat din ne thei mihei the. Kumme ki meigeisi ruina mi ti hei thailou mak bam me. Kumpuijaeng ruina nthanmei latrik ruina mi lam khou hei dinne tumei jao khang e. Kahou khang aniu ruina baibal bam asaek hei jao cham lou kho.

1 Corinthians 16:1,2 hei meiguaina jao cham lou kho: “Nthanmei nun khang nkhalou khang sian kakhahmei lam khou thu, Galatime phuamling guai khou mi kumma su o tuna ai rui sa kanmei kumma nangniu ni su nina the. Ai guang pukhou kakha dat bam mak khang, kamei kamei rui ntaan guangmei thei lina neidak tuang reime tingmik nung nangniu mei kathuina rei patna lou kaduai bam nina the.” Aniu rui gut du makmei hu khou mi nun tuang verse khou salou mei hei kathai rei kho:

1. Hi khou hei tipatmei hei neidak tuang reime tingmik nung tipat khang

nge. Kum puijaeng ruai? Khristian mei nun rui kalum khang katinmei tingmik ni su the khatni mi tingmik khou hei tipatmei taan ni taan khang su lou muai the. Tiki, baime i tingmik nun guai tho? Baime i tingmik nun khou tipatmei taan taan khang salou mak ge. Mi latdan rui saloumei lung khou tho neidak tuang reime i tingmik nung tipat khang nge. Kachap baime i nun rui kaniu katinmei gan pum tipat kaduai bam ge i neidak tuang reime i tingmik khou na rammak sinni na. Kummecho tiki tho, salou bamme i latdan theilai e thei, saloumei tingmik nung khou na hei tipat khang nge nthanmei latrik theilaina. Kum puijaeng ruina Khrista Phuamling ruina neidak tuang reime i tingmik nung kalum katin lana tipatmei taan ni taan tuna taan guang tuang the.

2. Khristianme i guai ruina thu tipat khang the. Mi ram ti hei kame i kame i rui latoume i thei laina tipat dat kan khang nge. Poubaome i ruina thu kamaanse i nun rui ntaan guang mak nga thu tipat dat puni e tume i ning makge. Kummecho tiki tho, ntaan guang kanme i tei ruina tho tipat khang the kame i kame i rui latoume i chuat khou tei rui khatni latou lana tipat makme i kame i tei paep su the.

3. Kaniu guai ruina kaniu khou naime i theilaina lou kaduai na bam khang nge. Mi gan khou tei tho kaniu khou naime i tume i khou hei gannui pannu, khouring, ram e thei bai baime i puat nun bam nu the. Mi tei sian suna ni su bam nu de. Tiki ase i dou thu maanse i gei thang ruina sian khou suna aniu tuang phijaeng hei tina the. Tiki tho, kame i kame i rui latoume i tipatme i tume i hei kabam kabam khou rui ni tat the. Kum tina sian khou subam nu e, ram e thei puatche i khou suna ni tipat bam nu de.

4. Kaniu guai rui latoume i chuat khou tei rui tipat khang nge. Mi kiu thu kaniu rui ntaan guangme i theilaina tipat dat khang nge. Ki aju dou? Kaniu rui ningme i theilaina tipat khang the. Kumma ntao ni aniu rui kumma sumuai khang the. Latding Than rui tithe ram e thei ru dam ti khang samak ge. Aniu ruina thu ru dam ma kha tibam khang ram the, Jehudime i nun kumma kalam thu aniu thu Jehidime i nun tuang latdan khang suang gairanme i latding bang khou aniu thu bam tuang di the na. Tiki aniu ruina gai hianme i latdan khatni nrianloume i bang khou bam me thei tabui suna tipatme i ni tipat nbu mak bam khang cho? Asia khou ai rui thailoume i khou tipat ni gei de tiki raona tipat gei e. Mi hei geithang kiu tho, kame i rui latoume i chuat khou tei de, tiki gaansaek thu kame i rui latoume i chuat khou rui raona tipat bamme. Asia khou ai rui ni houpat loume i nai dat dihe kiu thu cinema jao khang, makhou-nrou khang, khatni baime i tu nbaime i puat khang hei sian nai bamme i ta. Ai rui thailou the mi nun guai hei nbaan tuang sugei tina the tume i, ki nang niu ruina kumme i nbaan puat khang sian nai e thei nang tuang

sian tei kummei thiak khou sinsu khang tha? Nangniu ruini mikummei khou tei nangniu siandui tei sinsu bam nu e. Nguai, aniu rui khou hei mi khang suang sinni hianna subam nu di he. Poubaomei rui sa e aniu lunggai lung khou rui ti khang. Nang rui adi kam lunggai cho tumei thai the khatni aju dou nang rui tipat khang cho tumei nang thai the. Tiki tho aniu rui tipatmei hei sian suna tipatmei rui gailiang nge. Nang rui ata kumma tini na e tuna sa khang rammak ge khatni ai ruina nangta kumma sa dat khang ram the, ki aniu rui geina tipat khang ram mak nga cho? Nang kiu nu dai?

5. Kaniu guai ruina kamei rui guangmei gan khou kakha dat bam mak khang rui tiguang kaduaina bam khang the. Kabiak khat thang sa pu e thei, kaniu rui katiu loumei tei piuna taan ne thei ram lam guaina tei nthuina bam kan puni the mi bam khou bammei nun guai ni khatni nkhaloumei latou nimei guai khang tei ni. Mi tei kumma aseini kum bam muai tuang the. Aniu ruina Raguang rui kahaomei lung khou tei tipat re thei phuamling hei siandui kage naime Poubamei tuang taan guai khou tei nthuina nai lana taan chui ngam puni. Ki phuamling gei thang mi kum mak nga kaniu rui neina gaankhat khou nganglouna bam gei e. Tipatmei phaen, gaansaek rui neina bam gei the. Gaansaek rui latrik juan na sian ntaan bam gei the. Gaansaek rui languanmei thiak kajat kajat suna bam gei the. Tiki tho Poubaomei rui tho kamei kamei rui ngammei lung khou tei rui tipat chuina tipat khang sa e khatni mi tei ruina phuamling mei khang kage naime guai tei nthuina tiguang tang ngam khang rui e. Mi thiak hei Poubaomei rui sunime thiak dinlou tuang nge khatni baime thiak kamei dinlou mak ge khatni taan khang nulou mak ge.

Ntao aniu ruina tipatmei lam khou saloumei verse baime jao dat kho. Mihei 2 Corinthians 9:6,7 khou phang the, mi kiu: “Linglou raomei nun tei tai guang rao puni, linglou geimei nun tei tai guang gei puni tumei hei nigtau lou o. Mei kathuina kamei kamei rui dingloumei thei laina tikan diu. Njahna ti mak nu mak khe tuna ti ri o; kalam thu neilana tipuime ta tei Raguang njian e.” Ntao hei nun hei jao o chi:

1. Kamei rui sa e aniu rui lingloumei theilaina taidat puni tuna. Aniu rui linglou rao e thei tai rao dat khang di the. Tiki aniu rui linglou gei e thei thu taigei dat khang the. Mi hei kailao taanmei gan khou khatni languan-lan-daemmei gan khouni nchumme, khatni aniu panti luan guai khou hei. Kumma mihei phuamling tuang taan khou ni kummuai tuang nge. Aniu rui lou bu e thei, latou nbu dat muai khang the. Asei dou maansei nun rui latou makmei hei kaniu rui tikeilou jat timak nga ni e. Nang ruina phuamling khouna la rap bam khang ram mak ge nang ruina ti ni tipat khang nge. Ai ning nge meigei

thang rui Poubaomei ta lum mak nga bamme tumei. Aniu rui thai chuiloun-imeimei lam kiu tho, aniu rui tipat gei e thei, latou dat gei muai puni e.

2. Kamei rui sa e aniu lung khou dingloumei theilaina tipat khang nge tuna. Kalum khang guang mak khou ruina gaankhat ruina tipatnimeimei kasing tei thaireina rakai tat khang the. Mi tei the kamei rui sabamei kiou. Ki nang rui tipat nimeimei tei thailou mei kage e aju nang rui tikhang cho tumei nang rui ngam mei lung khou.

3. Kamei rui sa e gaankhat rui tinina tipat khang nge tuna. Mikiu tho gaankhat rui sunmei jaeng rui ramme thei tanggai mak nga tipat ni tuang nge tuna tipatmei ram mak nga ti khang nge tuna. Tini mak nga tipat mei ram ti tei nsa ram ti de the.

4. Gaankhat rui tipatmei gan khou tanggai maknga tini tuang nge tuna ning nga tipat khang nge. Poubaomei rui gaankhat ta namphu suna tipat khang ning mak ge.

5. Raguang ruina kahaomei thu neilahna tipatmei ta de. Kamei rui nang aju dou/tabui thiak khou tipatmei ta lani bo? Nang ruina neilahna, tinina tipatmei ta re kamei rui kahaomei ram ti tumei kiu. Kummei ram ti tei the aniu rui sunimeimei kagan kathuina khou.

Ntao luaisin lou dat ni khou, aniu rui thailounimeimei hei Poubaomei rui salou dumei lat tei chulou kho: “Latoumei suang tipatmei rui suaihiam mbu e”. (Acts 20:35). Adiu si e kiu thu aniu ruina latoumei rui tipatmei suang suaihiam mbu e tuna sabam pu khang. Kalam kiu tho, aniu guai hei pari/tanthi the, karahrana khang ning the, kumpuijaeng rui Raguang tuang sumei puatta asut tu bam tуди the. Raguang rui aniuta nkhalou diu katuang sumei tei nthuina tipat ngam khang. Aniu rui subammei khristian panti hei nthanmei latrik theilaina tipat mak saan guang tang ngam nitu ram me.

LATTHAN

1. Baibal rui tipatmei lam khou din bo?
2. Meigei thang tipatnimeimei thiak tei nchumma tipat pu dai?
3. 1 Corinthians 16:1,2 hei palou o.
4. Khristian mei rui kamei rui latoumei tei tipatlou kaduaina katin nimeimei tingmik tei sa o.
5. Baimeimei tingmik lam khou tho?
6. Adi kamma kha katupma baimeimei denomination nun rui tipat kaduaimiei taan hei su bam bo?
7. Khristian kaguaina rui tipat khang tha?
8. Gaansaek rui tipat ngam mak pu khou kumna tha?
9. Poubaomei rui kamei nun guai rui ntaan guang mak sinni tipat khang

ning pu dai?

10. Kamei ruina tat kanmei neidak khou tei ntaan patmei tei kakhang-tipat dat khang ning bo?

11. Kaniu rui tabui ti khang?

12. Kaniu rui aju dou ti khang?

13. Latding Than rui tithe ti khang sa bo?

14. Kummei jaeng rui rudam khou rui hian na aniu rui ti khang cho?

15. Maansei nun rui kaniu rui kahaomei la khang sian nai rap rap pu dai?

16. Kummei jaeng rui Poubaomei khang geina nai mak tuang cho?

17. Kummei jaeng rui khristianmei rui tipat khang cho sa o.

18. Rachap geithang mei rui tabui thiak khou kaniu khang sian kage naime tei phang nu khang rui su kan bo?

19. Mihei Poubaomei rui kamaansei nun rui su khang kahaomei thiak dai?

20. 2 Corinthians 9:6,7 hei palou o.

21. Kathu nroumei khatni kathai taidatmei tuang kadaisumei latku tei sa o.

22. Kummei jaeng rui aniu geithang kathai tai gei dat makpui tuang cho?

23. Aniu lungding theilaina tipatmei tumei kaba hei tabui cho?

24. Aniu rui tipat aliouna rammethi taangai maknga tipatmei tihei Poubaomei rui kahao dai?

25. Kumma tipatpui mei ta Poubaomei rui kahao bo?

26. "Latoumei suang tipatmei rui suaihiam mbu e" tumei hei thou rui sa tucho?

27. Tipatmei gan guangmei gan khou Khristian geimei rui tabui su kan cho sa o.

PARA 13

RAKAI KUHMEI/ KALUM KHANG KATINMEI

Khristianmei khang jaengsi liangmei thu rakai kuhmakmei hei the. Tabui kumma gaankhat rui Poubaomeita lum de tuna salana phuamlingmei nun le tuna thu kalum katin mak tunu dina cho? Kaba tho, kum subam ma tho kamei tei Poubaomei ta lumme na sa khang biu mak ge tumei tuang nge.

Denomination khristian mei gei thang tingkum khou rakai/ kalum khang katinmei hei kasing kanei na de- Christmas le Easter khouna kha, mi hei thu Raguang latkaeng rui dinlou jat mak ge. Tiki, meigei sih rui kaniurana ta guat-

na kakhanna bam khuanne mi thiak hei rui Poubaomeita tipian lou ngam puni de tuna. Poubaomei hei thou e tuna ning bam geilan chu? Tiki, aniu ruina kakhan diang gut pukhou hou e meigei si rui rakai ku mak nga bammei ta. Kaniu rui ramlam akhat saduakmei lat sa lana khamma bam khuanne. Mi tei thu kaniu taan rui ti ntaam bam tuang nge phuamlingmei le tuna. Kaniu rui thu hi rui de, hitei rui de tuna kham bam kanni di the. Tiki tho, kaniu rui kumma saduakmei chaeng tina sabammei hei Poubaomei rui lalou puni dai? Khui hei kaniu rui khristian de tuna sana bamme tiki tho rakai thu ku jat makmei suna bam khuanne. Kaniu rui kaniu rui ningmei taanruai na tei taan lana bam, tat lana bam khuanne, kaniu ruina heidi kam makha phuamlingmei le duna ntaam bamme tumei kaba tei thai tang lou mak nga.

Rakai ku makmei nun ruina hi kumma sa rap rap bam khuanne: “Tiki ai tho kai khou kalum rap bam tude” tuna. Mei tei Poubaomei rui kahaomei e thei thu gai de. Tiki tho kamei rui nthanthiaknga dinlou e neidak tuang reimeitumik khou kalum bammo/rakai ku na bammo tuna. Kumma taan bam me thei kaniu ruina kalummei na ram the, kathai the, lu suan the, Poubaomei taektu ni tu the, khatni tipatmei taan ni taan the. Ntao kakai khou kalum bammei nun rui thou khang tipat bam tha? Poubaomei taektu tho? Ai rui lum baek baek nga lumme tumei tho kaniu tei kalummei ling nga kan di the kakai khou taan bam kanmei kiu. Kaniu ta tithai lou bam khang nai the hikiu tho Raguang ta kalummei na ruina biu mak ge tumei hei.

Kagan asaek khou thu khristianmei akhat ruina rakai ku ngam makmei gan nai puni de, sunu-naonianmei gan khou, ram e thei, kadat cha mak hakmei gan ni ariunu de rakai ku khang hei. Mi lat bam khou hei gaankhat rui saduakmei lat sadat thuai rap khang ram the, cha mak hakmei tuang nai tina di the tuna lalou khang di the. Tiki tho, Raguang rui saduak khang khamma samei ta Poubaomei rui lalou ni turamme tiki kadat cha makmei ta thu kamei rui kuaklou bam me.

Tiki ntao aniu rui Raguang lat rui rakai ku mei lam khou tabui salou tu cho tumei tei jao kho. Hebrew himeipu rui kumma sa e, “Aniu pat pat, gut gut tuang su maknga, aniu riguanmei tei ntima sin di kho. Kalam thu latrian suloumeipu hei kalat suaimeipu ram e. Njian thai khang khatni gaitaan taan thai khang khat khat ta akumma katiu thao kho cho tumei kakhan kho. Mei gaansaek kaniu cha su bammei tei kumma aniu guang kariumei khou ntaem ri kho. Poubaomei tuang Tingmik ana guang the tumei nangniu hou-pui thei laina aniu khat khat ta katiu thao mbu hai hai bam di kho. Kalam thu nchummei tei thai tang lana aniu thaina thaina paep taan bam e thei, aniu paep khaeng kuak dat khang ram baime maek khe. Mi kummei nun tei

thu guang nimei latjan khatni Raguang ta nu makmei nun ta sumaan nimei mai ta tei pingnga khuan bam khang nga di the” (Hebrews 10:23-27). Ntao aniu rui kadai sumei latbam nun hei khou jao kho:

1. Aniu rui lumlounumei pu ta subam mei thiak tei kumma aniuta ni lumlounumei pu rui lumlounumei thiak khou su khang nge.

2. Aniu rui khat khat khang gaitaan hei taan lou bam khang nge.

3. Aniu rui katinmei khou/rakai kuhmei ta npatlou lakni na e. Gaansaek rui kagan khat khou khatni ntao ni kum bam me, mihei Poubaomei rui chunmei ramme.

4. Poubaomei tingmik hei ana guangmei theilaina aniu rui khat khat ta katiu thao lou bam khang nge, rakai kuh khang. Hikiu thu aniu ruina aniu rana chandaanna bam khang the. Aniu khang hei neidak kapum nai the kumma subam khang hei, neidak pum.

5. Aniu rui ningtou lou nimei kiu thu aniu rui thaina thaina paepsu bam kخانه thei kuaklou khang khaeng kaluai dat khang maek khe tiki latjan khatni nkhuamei khou keilou rap nimei na di the. Hikiu tho, aniu rui thaina thaina rakai hei ku mak bammei thei thu Poubaomei rui aniu ta kumma gulou dat khang cho tumei hei e. Kummei jaeng rui aniu rui kum bam di he tu e thei, aniu hei amaanmei su rap puni di the.

Hi guai rui sabammei tho Poubaomei rui aniu ta rakai kuna katinna bam khang ningmei tuang nge tumei e, mihei nthukmei tuang de, khatni kungsimei tuang de aniu rui taan makmei gan khou. Tiki kamei rui kum su bam khang ningmei hei tabuijaeng ruai? Kalam mpeina nai e khou hei. Aniu kalam asaek tei jao kho:

1. Kalam kiu tho aniu rui kum subam khang su nchinlou the khat ni mi hei latdan ne. Aniu rui Hebrews 10:25 khou tei pahtou e rakai aniu ruina ku mak nga bam mak khang rui. Kumdat lana aniu rui Acts 2:42 khou khristianmei nun rui kumma rakai ku na katin bam kan bu cho tumei, khatni Acts 20:7 khou rui Paul khatni Troas khou bammei khristian nun guai ruina neidak tuang reimeit tingmik nung kalum katin bam kanmei/ rakai kuna bam kanmei tei. Mi tei kum muaina aniu ruina taanbam/su bam khang the.

2. Aniu rui Raguang ta kalum khang ruina guang kaduaimeit khou/ rakai ku mei khou tei kajao bam khang nge. Khrista ruina John 4:23,24 khou salou du e hi kiu tho Raguang rui nchumma kalummei ta phu e khatni kamei thu bumaeng de khatni aniu rui kata bumaeng khou khatni nchummei khou rui kalum khang the.

3. Poubaomei rui aniu ta rakai ku khang/ kalum khang katinmei khou kajao khang lanimeit lam thu aniu ruina Poubaomei taektu tei tu bam khang

ni the. Paul ruina Poubaomei taektu lam khou saloumei kiu thu ntian tei ruina Poubaomei pumta ningtao bam khang khatni buang tei ruina kajei keiloumei ta tei ningtou bam khang rui e. (1 Corinthians 11:24,25). Tabui kumma aniu ruina Poubaomei rui kahao mei thiak khou tei taan pat ngam khang cho neidak tuang reimei tingmik pum katin mak nga?

4. Aniu rui katin bammei/rakai ku bammei hei aniu rui ntaan laan patloumei tei tipat/katpat kaduai khang rui the. Kum dat lana 1 Corinthians 16:2 khou tei Paul rui sa the aniu ruina neidak tuang reimei tingmik nung katin lana katpat kaduai/tipat lou khang aniu rui ntaan patmei theilaina. Aniu ruina katin mak puigan khou aniu tuang kat kaduaime tei kum kan tha? Ngua aniu ruina katin datmei gan khou kiu tipat dat nu de, tiki mitei thu sunu-naonian nang nga rakai ku ngam makmei gan khou rui su khang de, tiki tho thou kummei rui rakai ku makmei tei tho tipat khou tei ni kajao mak muai kan nu the, mi tei na ram mak nga kamei tei kum rakai tei ku dat mak nga bam nu e tipatmei taan teini taan dat mak bam nu e kamei ruina kummei nthukmei lam ta tei thou sulou mak nga khatni Poubaomei ta chakhuang sulou mak nga.

5. Poubaomei ruina katinmei bam khou tei bam ncham lou puni tuna rian lou e. Kalatrian tei nking jao o: “Kalam thu gaannei gaan thum ajan khou guang kariuna bammei bam khou tei ai bam e.” (Matthew 18:20). Mi na rui sinni biu the aniu rui katinmei khou tei katin ni na bam khang kalam kiu tho kummei bam khou tei kamei ni bam kajao bammei jaeng rui. Aniu ruina Prime Minister kummei ram e thei baime me saengdai me rui katinmei bam khou tei katin ni mak dai? Mi nun khang tei suang dai nbu, ngam nai nbumeipu Poubaomei kahak bam puni the tumei, luan akhatna ni ramma, katinmei pum tumei khou tei, aniu rui katin ji bam khang nai dina cho? Kaling nga aniu ruina khou tei guang katin mak ngam ni tuang ram the heidi nthukmei taan taan khang hei kamei kahak rui kajao puni the tuna salou bammei bam khou hei.

6. Aniu rui katinmei gan pum katin ni khang di the kalam tho aniu khang kum su bam khang ruina su nchin lou the. Aniu khang kaikhun, nji-an diangmei, ruprian, khatni kandime heijumei ruina aniu jaona bam the. Kaniu ruina aniu ta jaona bammei hei su nchinlou me khang khatni ncham lou, chaeng jai lou khang rui the. Aniu ruina mihei thailou na taan pat khang hei karam ni tuang the khatni aniu ruina nchummei chaeng khou tei jailou khang the. Kaniu tuang ringbam tei aniu thiak khou ngang lou bam tuang the aniu rui thailou mak bam khuan sinni na. Paul ruina Thessalonicamei nun khou kumma hi e: “Nangniu aniu thei akhatni Poubaomei thei lai njei

o. Kalam thu nangniu rianramei mpeina ariu sinni, Bumaeng Nthanmei tuang neihlamei le kajaona lat tei nangniu laalou kan the. Kumma nangniu hei Makidonia khatni Akhaiamei nun khang lai njei nuhmei su the.” (1 Thessalonian 1:6,7). Aniu thei mei nun rui aniu lai pui gan khou kiu aniu rui kaling sing nga kaniu Khrista thei lai ngam puni dai? Aniu rui ngam khang the. Rakai ku khang/ katinmei gan khou tei kajao khang tei cham raeng su tho khatni mi tei kagan chana, rim rimma khatni chakhuang champouna Poubaomeita kaling chang nga kalum khang su khang the.

7. Aniu rui rakai ku nimei hei aniu rui katin khang khatni mi tei ruina bumaeng panti daithao khang, aniu pum khatni meiguaina phuamling meiguaina dai thao khang. Phuamlingmei na nun rui katin mak ge thei kumma phuamling tei dai thao khang cho? Katin mak nga tho phuamlingmei na nun rui khat khat lam thai ni tuang ramme, khat khat tuang ngam thai lou ni tuang ram the, phuamling mei rui taanpatnimei lam kasiam nu mak khe, khat khat ta nkha ngam ni tuang ram the, khatni khat khat ta katiu thao ngam ni turam the. Kabiak khat khou sa e thei phuamlingmei taan guai hei, kapum tan hei, khatni phuamlingmei rui taanpat nimei lam kaguai hei katinmei khou rui nai tuang the. Kaling si tho katin mak ge thei phuamling tei thei mei phuamling su puni de. Kum tipui jaeng ruina Latding Than tuang phuamling khou katinmei gan khatni katinmei bam khou tei Paul khatni bai-me chana nun guai ruina kabam kabam khou naime phuamling khou tei katin tat bammei tuang nge katiu rui tatloumei tatloumei bam khou tei. Aniu khou dinlou e riaprai mei gan khou sinni phuamlingmei nun tei katinmei gan phu lana khatni kadou chamei ta phuna katin tat bam kanne tumei. Mi tei kummuaina aniu ruina ni kachaeng kalaime tuang maek nga Poubaomei ta kalum khang khatni kataan guai tei taan pat khang su khang nge.

Khatni mi nun guai hei aniu rui taan bamnime kalam asaek nga saloumei tuang the rakai ku /kalum khang katin bam khang phuamling khou. Tiki thailou kho aniu rui rakai ku mei hei bu khou ku guai, kanei ram e thei kaluan luanna kha ku lou mei thiak tei, tiki katupma khatni kachaeng nga kuna bam khang nge neidak tuang reime tingmik pum khatni phuamling mei rui kariu tina gaini mei gan pum. Thanmei latrik rui sa e, “Katinmei khou tei ntaem maknga” tuna. Mi hei kariuna mei gan guai ta satuang nge. Poubao-me rui aniu ta katin lana bam khang nkhalou kan diu o khatni aniu ruina lumlouna kata thuanna bam ngam khang. Aniu ruina kata lumlouna kum su bam methei kamei ruina ni aniu ta lummei taan tei aniu ru khou taanlou muai puni e.

LATTHAN

1. Khristianmei rui jaengsi liangmei mei taan taan nuhmei taan kiu akummei tei cho?
2. Khristian mei akhat ruina rakai ku mak lana lummei sunu dai?
3. Denomination nun rui tabui kummei mung kanei hei tho kajao rap rap bo?
4. Khristianmei ruina rakai ku makmei lam sa nkham lei mei nun tei hipat ro.
5. Khristianmei ruina rakai ku mak nga kakai khou rakai ku/kalum bam nu dai?
6. Kalingmei khristian rui kumma suni puni dai?
7. Kummei gan khou khristianmei ta rakai ku mak sinni kuaklou nu bo?
8. Kaluan chamak nga ti katuakmei tumei hei tabui cho sa o.
9. Hebrews 10:23-27 hei pa o.
10. Kummei jaeng rui aniu Poubaomei ruina lumlounu pui mei su khang cho?
11. Katinmei khou kajao makmei tumei hei tabui kabah cho?
12. Kummei thiak khou khristian mei akhat rui khristianmei akhat ta kalum khang tining tou lou khang tha?
13. Hebrews 10:25 khou tingmik ana guang the tumei hei tabui ta cho?
14. Paep sunina sumei nun khou hei kum kan puni bo sa o.
15. Phuamlingmei tuang katinmei/rakai ku ni mei lam asaek sa o.
16. Thaorei khoumei khristian nun rui katin kanmei bam kanei sa o.
17. Kalingnga kalum khang katin/ kaduai mei lam tabui khang cho?
18. Katin mak sinni aniu rui Khrista ta ningtou nu dai kaduai/katin mak sinni na?
19. Aniu rui rakai ku khou tipatnimei tei katin makmei jaeng rui tipat makmei tei akum ma su khang tha?
20. Thou rui aniu katinmei khou tei bam e tuna sa bo?
21. Kummei gan khou Poubaomei rui aniu khou bam puni cho?
22. Kalum khou gaan khat rui taan lianpat nimei tei heidi thuk ge tu-me lam tei kathai o.
23. Aniu katinmei khou rui tabui nai tha?